



Niuspepa bilong ol Papua Niugini stret

Wantok 121

NUPELA PLEN LONG HELPIM TAUN NA PLES

Gavman i senisim pinis we bilong tilim mani long tupela bikpela program bilong em. Dispela tupela program em long Eben Eria Ektiviti Plen (U.A.A.S) na Viles Ekonomik Developmen Fan (V.E.D.F).

Minista bilong Fainens Mista John

Kaputin i tokaut long dispela taim em i bin tokaut long baset bilong yia 1981.

Mista Kaputin i tok, dispela senis i kamap long wanem, aninit long olpela we bilong tilim mani i go long dispela projek planti mani i bin paul.

Long olpela we gavman tasol i givim mani i go long kirapim ol projek aninit long ol dispela program. Tasol nau nogat. Taim ol pipel i mas putim 20 pesen, na ol beng 40 pesen, orait gavman bai putim 40 pesen i go.

Insait long ripot bilong Eben Eria

Ektiviti Plen (U.A.A.S.) Gavman i tok olsem. Long yia 1979 i gat 292 eplikesen (pas) i kamap long opis bilong U.A.A.S. long askim ol long helpim ol kain kain projek bilong ol pipel.

U.A.A.S. i yesa pinis long 87 eplike-
I go moa long pes 2

SOIM PASIN TUMBUNA



Luke Daugi, Gret 4, bilong Noten Provins hatim singsing i stap. Sen Martin Skul, Koki, bai bringim singsing i go long ol Intenesenel Skul. Ol i laik soim ol ovasis manki ol pasin tumbuna.

Wanpela kom-yuniti skul tisa long Sen Martin long Koki, Mista Don Gaso i traihat tru

long skulim ol sumatin long pasin tumbuna.

pasin tumbuna ol i bin lainim pinis ya.

Mista Gaso i tok tu olsem, i gutpela ol sumatin bilong Intenesenel praimer skul i mas lainim ol pasin tumbuna bilong yumi. Long wanem, ol i stap skul long hia na ol i mas kisim liklik save long ol pasin tumbuna bilong yumi.

Long taim bilong Ats Festival em i bin skulim 30 gret 5 na gret 6 sumatin long kain kain singsing. Tasol taim bilong Ats Festival em i pinis long taim. Nau em i laikim bai ol sumatin i no ken lus tingting long dispela

Mista Gaso i kamapim pinis wanpela program ol bai bihainim na go raun long ol Intenesenel praimer skul na putim so bilong ol sumatin i lukim. Em i laik soim ol pikinini bilong arapela kantri ol pasin tumbuna bilong yumi.

Dispela grup i raun long sampela Intenesenel praimer skul pinis. Ol i go pinis long Ela Bis, Mosbi na Korobosea. Orait, ol i salim welkam long Korobosea Intenesenel praimer skul i kam

I go moa long pes 2

SIMBU GO HET stori na poto p5



Ol Simbu bung amamas taim ol i bringim mani i kam long Gavman. Ol i bungim moa long K6,000 long kirapim wanpela Haikul. Ol i wokim long Sande 3, Novemba long Gembogl.

INVESTMENT CORPORATION OF PAPUA NEW GUINEA.

SEA PRAIS - NOVEMBA 1980
(Prais bilong sea wantaim fi mani)

50 sea	K 56.00
100 sea	K112.00
150 sea	K168.00
200 sea	K224.00
250 sea	K280.00
300 sea	K336.00

Wok bilong salim na baim bek ol sea bilong dispela fan i bihainim tasol ol toktok i stap insait long Prospektus. Prais bilong wan wan sea long Novemba 1980 em i K1.12. Prais bilong baim bek sea em i K1.10 - 2t i raus long baim koporesen.

Plis salim wanpela Prospektus buk bilong yupela i kam long mi. TO: **INVESTMEN KOPORESEN, P.O.BOX 155, POT MOSBI.**

NEM:

ADRES:

WOK FAMILI - WOK TURIS

Insait long nupela baset Gavman i katim moa long K4 milion long wok Kalsa na Turis. Tasol ol i skelim K2.7 milion kina tasol long Famili Sevis.

Mipela hia long Wantok i lukim dispela samting na mipela kalap nogut. Mipela i lukim ol planti kain kain wari i kamap nau insait long ol famili. Planti papa i save spak nabaut na i no givim kaikai long ol famili. Planti mama i karim pikinini nating. Planti mama i wok yet long askim Gavman long helpim ol long kisim mani long papa bilong pikinini bilong givim kaikai long pikinini.

Wok famili em i wanpela bikpela wok insait long PNG. Wok turis em i no gat namba, no gat nem. Mipela ting mobeta Gavman i senisim mani bilong tupela, na salim K4 milion long Famili Sevis na K2 milion long wok Sayens, Kalsa na Turis.

Provinsal Kabinet bilong Simbu Provinsal Gavman i pasim dring long Simbu. Long Mande 10 Novemba olgeta pablik hotel na lika stua na ol klap na taven long ples long Simbu i no inap salim dring moa. Kabinet i tambuim ol long salim dring long 3 mun olgeta.

Primia bilong Simbu Provinsal Gavman, Mista Matthew Siune i putim kamaut dispela aidia long traim stapim ol trabel i save kamap long Simbu Provins.

Wanpela tokman insait long Provinsal Lika Laisens. Bot long Simbu i tok, dispela em i nambawan taim tru Provinsal Gavman i wokim olsem insait

long provins. Bipo Provins i save pasim dring long pablik holide tasol.

Long Mande 10 Novemba samting olsem 200 pipel i kam insait long Provinsal Gavman opis long Kundiawa. Ol i kros tru long wanem, Provinsal Kabinet i no laik rausim tingting bilong ol long pasim dring long provins.

Long Fraide 7, Novemba ol pipel i givim wanpela pas i go long Provinsal Kabinet na ol i raitim sampela tingting bilong ol.

Ol i tok, Provinsal Kabinet i mas rausim dispela tingting bilong ol long pasim dring. Na larim ol stua, hotel, klap na

taven op i stap.

Na tu ol i laikim bai Kabinet i larim ol stua, hotel na klap i salim olgeta dring i stap yet long stua bilong ol. Sapos nogat ol i laik bai Provinsal Gavman i baim ol dispela dring.

Na tu ol i laikim bai Gavman i larim ol long salim bia stat long 10 klok moning i go inap long 5 klok apinun long olgeta de. Provinsal Gavman i larim tasol Simbu Motel long salim bia wantaim kaikai long ol turis na man i slip long motel bilong ol. Ol arapela ples i tambu

Dispela 3 mun tambu bilong gavman i bagarapim

pinis bisnis long hotel long Kundiawa, na 36 taven na 69 klap na 198 lika stua insait long provins.

Sif Lika Laisens Komisina, Mista Willie Taugau i tok pinis olsem, em i laik bilong wan wan provinsal gavman long wokim lo bilong salim bia long provins bilong ol. Em i tok, dispela lo ol i wokim bai helpim ol pipel na provins wantaim.

Lo bilong Provinsal Gavman yet i tok orait long Provinsal Gavman long wokim lo bilong ol yet long salim bia long provins bilong ol.

WESTEN HAILANS
Westen Hailans Provinsal Gavman tu, i no rausim yet

tambu ol i putim long ol lika stua. Dispela tambu i stat long yia 1978 i stap yet.

Provinsal Gavman i tambuim ol stua long salim bia, na ol i no ting bai ol i rausim dispela tambu long dispela taim. Nogat tru.

Tasol Provinsal Gavman i givim pinis laisens long ol pipel long ples long kirapim klap na taven na dring insait long en. Gavman i ting, sapos ol pipel i dring long ples yet i gat ol bikman long ples i ken was na stapim ol trabel i kamap long dring.

Tasol Westen Hailans i gat 23 klap i gat laisens long salu

1 go moa long pes 3

HELPIM TAUN NA PLES

1 kam long pes 1

sen na ol i rausim narapela 95 eplikesen. I gat 20 moa ol i salim i go bek na askim papa bilong en long wokim gen.

U.A.A.S i tilim K547,219 (547 tausen, 219 kina) pinis long ol pipel. Ol i tilim mani olsem:

- * Mosbi - K287,425
- * Lae - K89,882
- * Wewak - K30,492
- * Hagen - K36,050
- * Madang - K30,492
- * Kundiawa - K26,101
- * Goroka - K24,867
- * Rabaul - K15,500

Nupela plen bai karamapim olgeta eplikesen (pas) i go long VEDF Fan na ol eplikesen bilong wok bisnis aninit long U.A.A.S.

Gavman bai makim wanpela komiti bilong ol minista

long bosim dispela nupela plen bilong en.

Bai ol i traim long skelim wankain mani i go long olgeta provins. Planti ol provins i kros long wanem ol i ting olpela gavman i givim mani i go long sampela provins tasol na i no tingim ol arapela.

Praim Minista tu bai bosim sampela mani bilong U.A.A.S. Dispela mani em i ken givim tasol ol kain projek i no bilong wok bisnis.

Na tu ol Minista bilong Gavman i ken kisim sampela mani long dispela fan sapos ol i ting olsem i gat gutpela risen.

Planti man nau i tok olsem, wok politik i go insait long dispela nupela plen. Tasol wanpela tokman bilong Fainens i tok, dispela plen i orait long karamapim wok bilong VEDF Fan. Dispela long wa-

nem nau ol i ken save gut wanem ol pipel tru i laik kirapim wok bisnis.

Aninit long olpela plen ol i save givim tasol mani i go long ol pipel. Sampela taim ol bisnis i no save kamap gut. "Tasol nau, em ol pipel husat i gat strongpela laik tru long kirapim bisnis tasol bai aplai long kisim mani aninit long dispela nupela plen."

Na tu, Minista bilong Komes, Mista Opai Kunangel i bin tok em i laik lukim ol provinsal gavman i putim sampela mani bilong ol i go long kirapim wok bilong VEDF long provins bilong ol. Morobe Provins i bin tilim sampela mani bilong baset bilong em i go long dispela wok insait long provins.

Ol provinsal minista bilong komes na sampela primia i bin singaut long Gavman long putim

moa mani bilong VEDF Fan. Mista Kunangel i tok, Nesenel Gavman bai i no inap mekim dispela long wanem, ol i laik dispela fan i stap aninit stret long han bilong Nesenel Gavman.

Na tu em i wanpela we Nesenel Gavman i ken lukim sapos ol pipel insait long ples i traim long kirapim wok bisnis long helpim sindaun bilong ol o nogat.

Anna Rongap

OL MANI

Hia em sampela ol klap, bisnis grup, asosiesen Gavman i skelim mani pinis long ol. (Sapos yu laik lukim olgeta nem yu ken askim Memba bilong yu na em i ken soim yu buk i gat nem bilong olgeta man i kisim mani.)

MOSBI:

- TAURAMA BIS BOIS (trakta - ol pig - plank) - K16,000
- LUANGA YUT SENTA (Skul liva) - K37,319
- HOHOLA YUT DIVELOPMEN (woksap) - K34,000
- KATEMUL BRATAS (pig na kakaruk) - K12,200
- BOROKO Y.C. (garag na trak) - K15,000
- DAGAMO (Waigani) (trak na van) - K18,000
- LAE:
- J.O.B (woksap) - K21,232

- DUA DUA TIETA GRUP - K5,312
- MOROB WIMENS KAUNSI - K11,500
- WEWAK:
- NUIGO SETELMEN (woksap - ol tuls) - K11,000
- BOYS-TAUN (ol buk) - K5,000
- SKAUT HAL - K7,000
- YUT SENTA (S.D.A) - K2,000
- MADANG:
- ENGLIKAN KOMYUNITI SENTA - K10,000
- DIGFUN WIMENS GRUP - K1,000
- KATOLIK YUT GRUP - K3,000
- RABAUL:
- MATER DEI WIMENS SENTA (haus kuk) - K5,000
- HAGEN:
- HAGEN SKUL (skul liva) - K7,650
- TILING KATOLIK YUT - K7,500
- GOROKA:
- Y.C. Skul Liva (Klasrum) - K11,000

SOIM PASIN TUMBUNA

1 kam long pes 1

wantaim ol long Fonde long dispela wik.

Ol bai kam bung long Koki na kamapim olkain pilai na singsing Sen Francis komyniti skul i wok long lainim ol singsing bilong Noten Provins tasol. Long wanem, Mista Gaso em i bilong Noten Provins. Na tu, planti ol sumatin i skul long Sen Francis i bilong Noten Provins.

Mista Gaso i tok, i gutpela long ol

sumatin bilong Intenesenel Praimer skul i kam bung amamas wantaim ol sumatin bilong komyniti skul. Olsem bai ol sumatin inap lainim sampela samting em ol lain bilong ol narapela kain skul ya i save lainim.

Bai liklik grup bilong em i raun tu long sampela komyniti skul long taim bihain. Em i askim sampela tisa long mekim wan-kain wok em i stap mekim nau.

TAMBU TORO



OMBUDSMAN RIPOT

Ombudsmen Komis i putim pinis namba 5 ripot bilong ol i go long Nesenel Palamen.

Dispela ripot i soim gut tru hamas dinau mani ol bikman bilong Gavman i wokim long yia i go pinis. Komis i ripot long ol Minista, Memba Palamen, Het bilong ol Gavman Dipatmen, na ol Primia husat i kisim mani bilong ol pipel na dinau. Na ol i no bekim bek yet dispela mani inap long 30 Jun, 1980.

Ombudsmen Komis i tok, inap long 30 Jun 1980 dispel lain i no bekim bek yet K141, 446.16 (141 tausen, 446 hundret kina 16 toea) i go long ol bisnis na kampani.

Ombudsmen Komis i singautim pinis Pablik Loya long mekim save long ol dispela lida sapos ol i no mekim wanpela samting long bekim dinau.

Komis i tok, sapos ol lain ya i no bekim dinau bai ol i putim nem bilong ol long ripot bilong ol long yia 1981. Olsem ol pipel bai lukim.

Long ol dispela dinau mani kamap long han bilong:

26 memba na Minista bilong Palamen. Ol i dinau long K139,972.14.

1-pela bos bilong Gavman Dipatmen. Em i dinau long K50.90.

3-pela memba long ol kampani i stap aninit long Gavman (Air Niugini, N.B.C, Elkom, Hausing Komis) Ol i dinau long K26, 992. 88.

2-pela Primia. Ol i dinau long K2,293. 96.

Olgeta dinau i kam kamap long K169,309,97.

Ombudsmen Komis i tok, bihain long taim ol i salim pas long ol dispela Lida sampela i kirap na bekim sampela mani tasol.

Taim pas bilong Ombudsmen i kamap long ol dispela lida ol i kirap na bekim tasol K27, 863. 81. Sampela dinau i stap yet.

Em hia hamas mani ol lida i bekim.

Ol Memba na Minista-K25,232.67

Bos bilong Dipatmen - K50.99

Ol Memba bilong Kampani i kam aninit long Gavman K2,580.15.

Ol Primia ol i no bekim bek dinau bilong ol yet.

Ripot bilong Ombudsmen Komis i tok, K141, 446.16 i stap yet olsem dinau bihain long ol lida i bekim liklik hap dinau. Natu sampela ol Lida i no bekim yet las yia. Dinau ya em i samting olsem K124,286.80.

● Ben Kasanda

BEKIM BASET

Nupela baset i olsem wanpela pilai laki. Mista John Noel, tokman bilong Oposisen bilong Fainens, i tok olsem long Palamen long Tunde, 11 Novemba.

Mista Noel i tok, bipo Somare Gavman i go isi isi. Na ol samting bilong mani insait long kantri i ran gut.

"Tasol, nau gavman i laik lusim planti mani. Na sapos dispela nupela OK Tedi kopa mani i no go het kwiktai, bai bikpela birua i kamap. Long wanem, gavman i tingting bai ol i kisim planti mani long

dispela main." Na Mista Noel, Memba bilong Kiruwina - Goodenough long Milen Be, i tok olgeta prais i wok long go antap nau. Tasol, gavman i no was gut long dispela.

Na em i wari olsem, "sapos gavman i yusim olgeta mani, bai yumi kisim moa mani we?"


Em i tok olsem, bipo Fainens Minista, Mista Kaputin, i save wok long helpim ol man bilong PNG stret long bosim ol bisnis insait long kantri. "Tasol, nau em i luk olsem Mista Kaputin i lusim tingting long dispela gutpela samting."

WOK FAMILI - WOK TURIS



Liklik meri ya i kisim win na pulim smok. Em wok long ran bungim botol wantaim liklik brata bilong em. Wantok i painim tupela long Boroko long las wik. Long dispela taim ol famili i painim moa moa trabel long ol taun. Gavman i skelim K2.7 milion kina long traim mekim indai ol dispela trabel. Tasol Dipatmen bilong Siens, Kalsa na Turis i kisim moa long K4 milion. Opis bilong Turis i tok, ol i kisim K302,000 (302 tausen kina) tasol na planti wok bilong ol i no inap go het.

WARA SEPIK KILIM BOI



Wara Sepik, Angoram ol pipel pasim maus lukluk i stap. Ol man long kanu i wok long lukautim liklik manki. Sori wara Sepik i kisim em pinis.

Long Fraide ol pikinini i pilai lap amamas gut tru. Ol i swim antap long wara, aninit long wara. Bihain ol i kam antap long liklik bris long Angoram na kalap i go insait gen long wara. Man, ol i no tingim papamama...ol i pilai amamas gut tru.

Long Sarere win i karim tok bilong wanpela samting nogut i kamap bringim long yau bilong ol pipel. Ol pikinini i no pilai amamas moa long wara. Planti pipel i sanap long liklik bris long Angoram na lukluk i go daun long wara. Na wanpela lapun meri i hatim kra i tru i stap.

Tarangu wanpela pikinini i lus long wara. Mipela i kisim tok olsem, em i bin kalap i go insait long wara na narapela boi gen i kalap antap

long em na subim em aninit long wara.

Dispela boi i no kam antap. Bikpela doti wara bilong

Sepik i karim em i go pinis.

Bihain liklik ol plisman i kam. Ol man i kisim glas na putim long ai bilong

ol. Ol i bihainim mambu pos long bris na i go insait long doti wara bilong Sepik. Sori, ol i lus...Sepik i win.

swim na lap amamas moa.

Ol i stap tasol kisim tok olsem bodi bilong wanpela pikinini i gat 10-pela krismas samting i drip i go daun na sampela pipel bilong Marienberg daunbilo i painim em pinis.

Dispela boi i dring wara na indai ya em i Sengi Anbab bilong ples Kambarama long Angoram. Krismas bilong Sengi em i 11.

TAMBUIM DRING

1 kam long pes 2

Rises Opisa bilong Westen Hialans Provinsal Gavman, Mista Thomas Alu i tok, taim Gavman i tambuim ol lika stua long salim dring moa moa pipel long Hagen i go long Simbu na Saten Hialans na ol i baim

dring long ol stua long hap. Ol i kam bek na wokim blak maket gen long Westen Hialans.

Olsem na taim ol klap na taven i long ples, planti trabel olsem birua long ka na ol bisnis bilong

blakmaket i pinis.

Mista Alu i tok, Provinsal Lika Laisens Komis i tok aut long las wik olsem, ol bai i no inap givim nupela laisens, long wanem, pipel i laik kirapim klap long 2 o 3 mun samting. ● Ben Kasanda

Ol pipel i tokim mipela olsem, dispela boi em i namba tri pikinini long dring wara na indai long Angoram long dispela yia.

Long Sande i no gat wanpela pikinini long dispela bris long Angoram moa. Ol pikinini i no



Go long Ailan tu

Dia Edita — Inap yu givim mi hap spes na bai mi autim liklik wari bilong mi. Wari bilong mi i go olsem.

Mi no amamas Long Is Sepik Provins. Ol anaunsa bilong redio Is Sepik ol i no save go raun long ol ailan long Wewak. Nogat tru. Ol i no save i go raun na katim daun ol singsing tumbuna na sampela string ben.

I luk olsem, ol i save go tasol long asples bilong ol. Ol i save go katim daun ol singsing bilong ol pipel bilong ol. Na dispela pasin em i nogut. Dispela kain wantok sistem pasin em yupela ol anaunsa bilong Redio Wewak tasol i save mekim. Na ol arapela provins i no gat dispela kain pasin.

Em tasol liklik wari bilong mi. Na yu husat man i laik bekim pas bilong mi, bai mi amamas tasol long lukim long Wantok Niuspepa. Tenkyu tru.

Zachson Anbei, Lae, Morobe Provins

Maski Plismeri

Dia Edita — Yu inap givim liklik spes na bai mi autim liklik wari bilong mi. Wari bilong mi i go olsem.

Bilong wanem ol meri i kamap plis? Bilong wanem ol meri i holim bikpela wok? Baibel i tok, man em i het, na meri em i no ken daunim man. Meri em i mas aninit long man yumi bihainim ol lo bilong yumi yet. Lo bilong God em yumi lusim pinis. Mi laikim Gavman bilong yumi em i mas bihainim lo bilong God. Na yumi abrusim lo bilong God na bihainim lo bilong yumi yet na bai kantri bilong

yumi i go nogut ol geta.

Yumi PNG kristen kantri orait bihainim lo bilong God. Yumi mekim olsem bai ol arapela kantri ol i lukim mipela na ol i mas bilip long Bikpela. Yumi PNG yumi Kristen kantri em giaman. Yumi no ken giaman God. Mi yet mi lukim long ai bilong mi na yumi giaman Kristen kantri.

Em tasol na husat brata o susa i laik sapatim mi orait rait tasol i go long Wantok Niuspepa na bai mi amamas tasol long lukim.

Lewi Goropipi Enga Provins

Dia Edita — Mi laik tok amamas long Gavman i tok aut pinis long ol ovasis man olsem, ol i mas i gat tiket bilong mekim wok insait hia long PNG.

Ol bikpela sios olsem Luteran Sios na Katolik Sios na Yunaitet Sios na Engliken Sios ol i gat bikpela wari tru long hap wok bilong ol. Ol i gat bikpela skul olsem seminari bilong trenim ol pasto, tisa koles, trenim ol dokta na sampela arapela kain kain trening skul bilong helpim PNG.

Mi save, yumi PNG i sot tru long ol saveman i givim trenim long ol kain

Ol Sios i wari

skul bilong yumi, Tasol wanem taim yumi inap redi na trenim ol PNG man i ken holim bikpela wok long Sios bilong yumi. Nogut yumi wari tasol na givim wok i go long han bilong ol nesenel man nating i no gat trenim. Mi ting, Sios i mas stat long givim bikpela wok i go long han bilong ol PNG man yet i ken mekim nau.

Mi yet mi wok pasto inap 10-pela yia pinis na mi lukim ol nesenel man i ken mekim sampela wok em ol ovasis misineri i stap mekim. Ol sampela sios i stap grisim ol manmeri i kamap Kristen pinis bilong wanpela sios long

kam long ol.

Olsem na mi pilim dispela tok Gavman i mekim i gutpela tru. Mi tok tenkyu tru long ol. Mi laik sanapim sampela tok sapos Gavman i mekim olsem em i tokaut long en.

1 Gavman i no ken kisim mani long ol misineri.

2 Pasim rot bilong ol nupela sios i no ken kam insait long PNG.

3 Gavman i ken glasim sampela sios i no gat gutpela kai-kai i kamap long wok bilong ol na i stap mekim nating em ol i mas lusim wok na i go.

4 Gavman i mas glasim wanem sios inap givim trenim long ol nesenel man na wanem sios i no inap mekim dispela wok. Nogut ol ovasis man i go i kam tasol na mekim wok i stap.

5 Sios i mas tok klia long eplikesen fom bilong ol misineri i kam insait long PNG long mekim wanem kain wok na bilong lainim wanem man PNG long wanem kain wok bilong sios.

Em tasol ol tingting bilong mi.

Pasto Ohuno Mambu Luteran Sios, Goroka, Isten Hailans.

Yu Yet Kamapim

Dia Edita — Inap yu givim mi liklik spes na mi autim liklik wari bilong mi. Em i go olsem.

Mi laik sapatim pas bilong brata ya Reuben Fruyamo bilong Goroka, Isten Hailans Provins. Long Sarere 25 Oktoba, mi ritim pas bilong em long Wantok Nius. Na em i tok olsem, ol Yuno Bratas String Ben bilong Tambul viles long Laiagam distrik insait long Provins, ol i kopim ol singsing gita bilong ol Madang Provins. Ol i singsing olsem Septemba 16 em i de bilong yumi, na ol planti moa singsing.

Yupela dispela lain ting, yupela i wokim gutpela

pasin, a? Em sem pasin tru. Na yupela kopiket stret. Na i moa gut long yupela yet kamapim singsing bilong yupela. Em i moa gut tru. I olsem long singsing tumbuna tu. Mipela ol manki Madang mipela i no save singim ol singsing tumbuna bilong ol hailans. Nogat. Na ol singsing gita tu. Nogat. Olsem na mobeta yupela i mas senisim tingting bilong yupela neks taim.

Na em tasol liklik wari bilong mi. Mi wanpela boi bilong Madang Provins tasol nau mi stap long NSP. Sapos husat man o meri i laik sapatim pas o bekim pas bilong mi, em i orait tasol.

John Matange, Panguna. NSP.

Salim ol pas i kam long: WANTOK BOX 1982 BOROKO

Wari Long Sista Fabiane

Dia Edita — Mi gat wari olsem, long wanpela kopi bilong Wantok Niuspepa mi bin lukim wanpela piksa bilong wanpela sista em i kisim medal, long wanem, em i stap long taim

wok na helpim ol sikman.

Bilong wanem Gavman bilong yumi i no amamas long dispela sista i mekim dispela kain wok? Long neks yia ta-

rangu dispela sista i mas baim K110 long wok pemit sapos em i laik stap long dispela wok yet. Sapos em i no baim, bai Gavman i rausim em long kantri.

Spendim Mani

Dia Edita — Inap yu printim liklik wari bilong mi long Wantok Niuspepa. Em i go olsem.

Deputi Praim Minista, Mista Iambakey Okuk em i bin spendim mani nating long arapela kantri. Na em i no tingting long kantri bilong yumi, PNG. PNG i gat planti provins i stap long

en na dispela tripela Dash 7 balus ol i no inap mekim wanpela wok insait long ol provins. Na Mista Okuk i no lukluk gut bipo em i mekim dispela pasin.

Sapos em i lukluk gut em inap helpim ol hevi i stap nau long kantri olsem ol Woda plis i save slip long haus kunai. Em i no stret long Gav-

man i mekim dispela kain pasin. Na tu Gavman i no lukluk long Lae na Hailans haiwe. Em i save karim hevipele samting na kisim i go long hailans. Na kisim sampela samting moa na kisim i kam bek long Lae.

Na ol dispela samting em Gavman i no tingting tumas long ol. Na dispela balus Dash 7 em bai inap karim ain simen na plang na kapa i go antap long hailans? Em tasol.

Paul Makak, Not Coast, Madang

Ating i gutpela yupela i no ken pasim maus long dispela samting. Yupela i mas tokaut long en i go long Gavman. Dispela sista i kisim medal long wanem, em i no wari long kisim mani. Em i laik helpim ol pipel tasol.

Bilong wanem nau Gavman i tok, em i mas baim mani pastaim na bihain em i ken stap skruim wok bilong em? Em tasol wari bilong mi.

E. Siot Wewak, Is Sepik.

Nupela Gavman

Dia Edita — Plis inap yu givim liklik spes na mi autim wari bilong mi. Wari bilong mi i go olsem.

Yumi bai kamapim ileksen long yia 1982. Em i gutpela long planti pati tasol ol bikman o ol memba bilong yumi long hailans 5-pela provins ol i kamap longlong olsem ol daiman stret.

Long wanem, nau yumi senisim olpela gavman na kisim nupela gavman. Tasol i no gutpela tumas long 5-pela provins long hailans. Gavman i no lukluk gut na tu provinsal

gavman i nogut na mipela i bagarap stret.

Long 1982, bai yumi vot long olpela gavman Pangu Pati. Em i kamapim gutpela developmen long Papua Niugini. Olpela gavman em i Kristen gavman stret nau nupela gavman i promis long kamap Kristen tasol i no kamap Kristen. Nogat tru. Yupela i save long ailan i gat sip na balus i save go long dispela hap. Na nupela gavman i no tingting gut long helpim ol hailans.

Rembian Gen B.C.L. Panguna, N.S.P.

MIPELA SAVE MEKIM OLKAIN

WOK BILONG BENK

☆ Pas Buk

☆ Sek Buk

☆ Man i ken putim mani long benk na winim profit mani.

☆ Sapos yu kisim narakain mani bilong wanpela kantri, benk i ken senisim i kamap kina na toea.

☆ Benk i ken stretim olgeta tiket bilong yu, sapos yu laik go lukluk raun long arapela kantri.

Bank of New South Wales (PNG) Ltd.

Mipela amamas tru long helpim yu

OL SIMBU BUNGIM MANI

Ol pipel long Gembogl long hap bilong Simbu antap i wet wet long taim tumas na Gavman i no helpim ol. Ol i stap krai long Gavman i wokim wanpela haikul antap long ples bilong ol i go lus nating.

Long taim ol memba bilong nau i winim ileksen na kam insait long Palamen long 1972, ol pipel long Gembogl i krai na askim

Gavman long hariap wokim wanpela haikul. Ol i givim dispela wari bilong ol i go long memba bilong ol insait long Nesenel Palamen. Tasol we stap dispela haikul nau?

Klostu bai haikul i kirap nau. Tasol dispela em i no trahat bilong husat..... Nogat. Em i trahat bilong ol pipel bilong Gembogl yet. Long las wiken tasol, 8-pela komuniti skul i bungim

mani redi long kirapim dispela haikul.

Ol Gembogl i makim 4-pela ples pinis bilong wokim dispela haikul. Wanem hap i gutpela em bai ol i skul long en. Ol i tok, dispela haikul bai stap longwe olgeta long ol ples i save kamapim trabel nabaut. Ol i tingting long putim haikul i stap long ples em maunten i raunim olgeta hap. Na ol i laikim bai ol studen i slip long banis bilong skul na go skul. Ol i no laikim de-haikul.




Wanpela bisnisman bilong Simbu i stap long Goroka, Mista Mathias Merimba i givim K1,000 bilong helpim kirapim haikul. Na Namba tu Praim Minista, Mista Okuk tu i givim K1,000 tu. Ol Gembogl yet i bungim K6,035 olgeta. Ol bai putim dispela mani wantaim mani bilong Mista Okuk na redi long kirapim haikul.

Stori na Foto Ben Marjen



Yu ting ol Simbu i no save gut long wokim singsing. Sori. Sapos yu stap tukim singsing bai yu kalap kalap.



Bikpela mani tru. Ol i pasim long wanpela bikpela laplap na karim i kam.



Ol bikman i wok long planim pos mani. Ol i bringim mani na putim stret long ai bilong Gavman. Ol i laikim skul na ol i wok long kamapim.

TOBAINING I PINIS LONG WOK



Mista Ereman ToBaining

Primia bilong Is Nu Briten, Mista Ereman ToBaining i pinis long wok bilong em long Fonde long las wik bikos i bin i gat sampela asua em yet i bin kamapim.

Tupela minista long kabinet bilong em i risain o pinis long wok minista. Na sampela moa i tok, ol bai pinis tu sapos Mista ToBaining i no risain.

Mista ToBaining i harim planti dispela toktok olsem, em i mas pinis long wok planti taim pinis. Planti dispela tok i tok, em i mas risain bikos em i stap mekim nabaut na i insait tu long ol trabel i

wok long kamap long graun.

Long Tunde Minista bilong Fainens na Jastis na Komununiti gavman, Mista Ronald ToVue i bin risain na tokaut olsem, em i no laik stap long taim gavman bilong Mista ToBaining i kisim vot bilong no konfidens. Olsem na i gutpela em i mas pinis nau.

Mista ToVue i tok, gavman i stap gutpela yet. Na em i mas pinis na i no ken insait long ol trabel i kamap pinis ya.

Kot i sasim Mista ToBaining na Minista bilong Hom

Afeas, Mis Jessis Kamara i kamapim sampela trabel na Mista ToBaining i insait tu long ol trabel bilong graun. Kot i tokim tupela long baim 150 fatom tambu. Na long pasin tumbuna bilong ol Tolai, dispela pe i bikpela tru na rong tu i bikpela tru ya.

Mista ToBaining i kamap primia long Septemba 1979 long taim Koniel Alar i go kalabus. Mista Alar i bin primia bilong Is Nu Briten bipo. Long mun Mas i gat nupela ileksen long Is Nu Briten na ol i bin makim nupela primia. Mista ToBaining i marit na i gat 7-pela pikinini.

OKUK TOKAUT

Transpot Minista, Mista Okuk i tokim Palamen pinis olsem, wok bilong PNG Siping Koporesen i no gutpela tumas. Na ol i mas klinim ol samting nogut i pasim wok bilong dispela kampani.

Mista Okuk i tok, bai em i mekim wankain olsem em i bin mekim long stretim wok bilong Air Niugini long stat bilong yia. Em i tok, sampela opisa i stap kisim mani long kampani tasol ol i no save givim bek sampela samting long kampani. Nogat tru.

Olsem na em i tok, long taim em i kisim wok minista, em i stat long klinim dispela pasin. Na em bai mekim wankain long PNG Siping Koporesen. Mista Okuk i tok, nau em i stap minista na

lukautim dispela wok na em i mas pinisim dispela pasin kwiktaim.

Long toktok bilong em long Dash 7 balus em i tok, dispela em i wanpela gutpela samting tru em i bin mekim. Long las wik, Nesenel Aelain Komisnin i bung long toktok long dispela samting Mista Okuk i bin mekim.

Mista Okuk i wok long bekim askim bilong memba bilong Lae, Mista Tony Ila long las wik long Palamen.

RENT BILONG HAUS

Gavman i tokaut pinis long plen bilong helpim ol pablik sevans long baim rent bilong haus.

Dispela nupela plen bilong gavman em long hapim pe bilong rent. Ol dispela pablik sevans husat i no stap long gavman haus bai kisim mani namel long K38.00 na K182.00 long wanpela yia.

Na ol dispela pablik sevans husat i stap nau long haus bilong gavman bai ol i baim hap pe tasol bilong nupela rent.

Gavman i wok long painim wanpela we bilong stretim wari wari wari ol pablik

sevan. Dispela wari i kamap taim gavman i tokaut long nupela pe bilong baim rent long yia i go pinis.

Minista bilong bosim ol Wokman, Mista Jakob Lemeki i tok dispela plen bilong gavman bai stretim wari bilong ol pablik sevans. Tasol presiden bilong Pablik Sevis Asosiesen Mista James Mileng i tok olsem, ol i hepi olsem gavman i traim long stretim wari bilong ol pablik sevans. Tasol asosiesen bilong em bai glasim pastaim dispela plen na bihain ol i autim tingting bilong ol.

MI NO PAULIM MERI

Minista bilong Envairomen na Konsevesen na memba bilong Nipa - Kutubu, Mista Ibne Kori tok long Palamen long Tunde olsem, kot i sasim em nating long paulim meri. Em i kirap sanap long Palamen na tok, mi no mekim rong tasol em i orait. Bai mi larim i stap long han bilong kot yet long painim olsem, mi no rong. Kot i bin sasim em long dispela rong long Fraide long wik i go pinis. Na em bai sanap long kot gen long 21 Novemba, 1980.

NIUS - NIUSS - NIUS - NIUS

***MAN BUKA DAI LONG ENGLAN** - Palamen i tokaut long Mande olsem, em i tru wanpela man Bougainville i bin dai long taim wanpela bom i pairap na kilim em wantaim sampela arapela pipel long Englan long stat bilong dispela yia. Dispela man em i Seg Putahu. Em i marit na i gat tupela pikinini. Seg i go long London long skul long pasin bilong kamapim muvi piksa. Gavman bai baim kompensesen mani long famili bilong Seg.

***OL NUPELA MAN LONG SKELIM SITISENSIP** - Kabinet i makim 4-pela nupela memba pinis long stap insait long komiti bilong skelim ol eplikesen bilong ol ausaitman/meri i laik kamap sitisen bilong PNG. Ol nupela man ya em Mista James Mopio, memba bilong Central Provins, Mista Matiabe Yuwi, memba bilong Tari-Komo, Mista Paulias Matane, seketeri bilong Foren Afeas na Mista Charles Maino, seketeri bilong lo.

***OL GRET 10 WOKIM EKSEMINESEN** - Samting olsem 6500 gret 10 studen i sindaun long 85 provinsal haikul na wokim ekseminesen long dispela wik. Dispela namba i winim tru namba bilong las yia. Dispela yia i gat 300 moa studen long namba bilong las yia.

***STRETIM KUNDIAWA HAUS SIK** - I kam inap 9-pela yia olgeta ol i toktok long rausim Kundiawa haus sik na go wokim long wanpela nupela hap. Ol i laik rausim olsem na i no gat wanpela wok kamap i bin go het long dispela haus sik. Na nau ol i no rausim i go long wanpela nupela hap yet na haus sik i go nogut tru. Olsem na Minista bilong Helt i askim pinis Dipatmen bilong Woks long wokim gut dispela haus sik. Dipatmen i yusim K37 tausen nau long mekim sampela wok na bai ol bai yusim narapela K150 tausen long mekim sampela moa wok neks yia.

***PALAMEN MEMBA INAP HARIM KIBUNG** - Ol memba bilong Nesanel Palamen inap go long kibung bilong ol provinsal kabinet na sindaun harim kibung bilong ol. Palamen i tok orait long dispela samting long palamen las wik. Ol memba i ken go sindaun harim kibung tasol ol i no inap vot insait long kibung. Planti memba i tok, ol nesanel memba i mas mekim olsem na bai ol inap senisim aidia wantaim ol provinsal memba na mekim wok kamap long provins.

***REDIO GOROKA I NO KRAI STORNG** - Memba bilong Goroka, Mista Sailas Atopare i tok, planti pipel bilong Isten Hailans i no save harim gut redio, long wanem, pawa bilong redio Goroka i no strong inap long salim toktok na singsing i go long olgeta hap bilong Isten Hailans. Long bekim dispela tok, man i bosim NBC, Mista Leo Morgan i tok, NBC i lukluk pinis long dispela wari. Na bai ol i mekim wok long stretim dispela wari klostu taim.

***OL BRIS LONG HAILANS HAIWE I REDI** - I gat 14 nupela bris i redi pinis long Hailans haiwe. Ol bris i stat long Erap Riva i go inap long Yung Creek long Markham Veli. Olgeta gris i redi long ol ka i ken yusim nau. Tripela tasol i wet long ol i mas mekim liklik moa wok tasol long ol, orait, ol ka i ken yusim. Na wok long putim kolta long Hailans haiwe klostu i pinis nau.

***PNG RETKROS LAIK HELPIM AFRIKA** - PNG Retkros Sosaiti i tokaut long las wik olsem, ol i wok long taim nau long kamapim mani bilong salim i go long ol lain tarangu long Afrika. Bikpela guria i kamap long 10 Oktoba, 1980 long Algeria na kilim indai planti pipel. Na planti arapela i kisim bagarap. Olsem na PNG Retkros Sosaiti i laik kamapim mani long salim i go long baim marasin na kaikai na klos bilong ol dispela pipel.

***GAVMAN I NO BAIM OL DASH 7** - Air Niugini i no baim tripela Dash 7 balus em Mista Okuk i bin kontrak long ol pinis ya. Ol bai kisim long mekim wok i stap inap long taim bilong kontrak tasol. Na insait long dispela taim em Air Niugini i mas baim rent o mani i go long papa bilong dispela tripela balus. Na papa bilong dispela balus i no gat pawa long kisim bek balus inap taim bilong kontrak i pinis. Pinis, orait, em i ken kisim bek.

WILL YOUR NEXT CAR BE A GOOD DEAL?



Buy where you see this sign and be sure

- three month guarantee
- after sales service
- spare parts back-up



BOROKO MOTORS LTD ELA MOTORS PACIFIC MOTORS STEAMSHIPS
BREWO MOTORS PTY LTD NEW GUINEA MOTORS PTY LTD PNG MOTORS PTY LTD TOBA PTY LTD

Motor Traders Association of PNG

ANG/MT 001

WANTOK NIUSPEPA

Nius i kamap 52 taims long yia nau.

Opis bilong Edita na Edvetaising long P.N.G.
P.O. Box 1982, Boroko
Telipon: 25.2500 Teleks: NE 22213

Edvetaising long Australia
Central Media Sales, Sydney
Telipon: 436.1000 Teleks: AA23211

PE BILONG WANPELA YIA, 52 NIUSPEPA

Ples	Kam long balus	Long sip
Mosbi	K 10.00	K 10.00
P.N.G.	K 14.00	K 14.00
Australia	A\$36.00	A\$29.00
N.Z, Fiji		
Pasifik Ailan	NZ\$47.50	NZ\$32.00
USA. Yurop	US\$70.00	US\$47.00
	DM 120.00	DM 81.00
	L 31.00	L 21.00

NUPELA SOKA KING

Soka king bilong PNG, Willie Seph yu mas lukaut. Liklik kandere bilong yu, Simon Emmanuel i laik rausim taitel bilong yu nau.

Simon Emmanuel em i bilong Nu Hanover long Nu Ailan. Krismas bilong em i 19. I tru planti ol soka pilaia na ol bikman bilong soka i no save gut tumas long em. Tasol em i soim stail bilong em pinis long Pot Mosbi Soka. Na i luk olsem em inap rausim namba bilong Willie.

Tasol Willie Seph i no wari. Em i amamas yet na holim taitel bilong em i stap long wanem, em i no save bungim dispela yangpela stailman long taim ol i pilai soka.

Simon i no olsem Posman husat i pilai long tudak bilong Willie Seph, na i no inap autim taitel bilong em. Nogat. Simon i yangpela yet na i no wok long taim tumas long pilai soka olsem Posman na Willie.

Long yia 1978, Simon i oin daunim wanpela tingting long go pilai long Nu Silan wantaim PNG junia tim long Oceania taitel. Na long Septemba bilong dispela yia em i bin lusim gen PNG junia tim i bin go long Hong Kong.

Tasol em bai kisim ples bilong em gen long dispela junia tim taim ol i go long Fiji long mun Desemba. Dispela em long pilai long junia Koka Kola Oceania taitel. "Mi save pilim nogut long lusim ol dispela PNG junia tim tasol mi mas go het long pilai soka.

Em i tok, em i no save gat inap mani long go wantaim ol dispela PNG yut tim. Dispela long wanem Simon i wanpela sumatin yet.

Simon i wokim namba wan yia bilong em long Yuni-vesti long Mosbi. Em i save piali long Guria unda 19 na stail bilong em i pulim Guria tim i go antap long Mosbi soka. Em i save pilai olsem straika na em i stail moa yet taim em i sut long gol.

Long Novemba em i bin pilai wantaim Pot Mosbi unda 19 long Nesenel Junia Sempion. Long dispela pilai Simon tasol i putim gol na autim Arawa long painal.

Taim Simon i liklik, Willie Seph i lainim em long pilai soka. Dispela em long liklik ples bilong tupela Metekavil, long Nu Hanover. "Taim mi stap long Praimeri Skul, Willie i skul long Utu Haikul na long holide em i save lainim mi long pilai soka."

Simon i lainim tru long pilai soka taim em i go skul long Utu Haikul long 1974-78. Long 1978-79 em i go skul long Kerevat Nesenel Haikul na em i bin pailai wantaim Tarangau prima.

Taim Wantok i askim em long hamas gol em i putim pinis, Simon i tok em i lusim tingting pinis. Tasol em i tok, em i save putim gol olgeta taim em i pilai wantaim Guria unda 19.

Long Pot Mosbi

soka em i no laik bungim kandere bilong em Willie Seph long taim bilong pilai. Em i tok, em i no pret long Willie ol Tarangau, "ol i strong tasol ol Yuni i moa yet."

Simon i pilai olsem yangpela pilaia i gat longpela taim long apim stail bilong ol. Taim mipela askim em long wanem taim em bai pinis pilai soka. Em i tok, "mi no ken pinis inap lek bilong mi i no inap karim mi, inap mi kisim bikpela bagarap."

Simon i no save pilai soka tasol, em i



hap man tu long resis long lek. Long 1979 em i makim Rabaul long Junia sempion long resis. Em i save pilai Rugbi tu taim em i stap long Kerevat Nesenel Haikul. Em i stap long skul tim bilong ol.

● Powes Parkop



Simon Emmanuel



Sori, Guria kipa no inap. Simon i putim pes gol long taim tim bilong em, Yuni i winim Guria 3-1, long painols long Sande, 9, Novemba.

Stand-by Savings
Stand-by Savings

SP515A

FLY

PE TRU NUPELA PE MANI YU PASIM

POM-LAE	K54	K33	K21
POM-WEWAK	K109	K66	K43
POM-MADANG	K76	K46	K30
POM-MT. HAGEN	K76	K46	K30
POM-GOROKA	K65	K39	K26
MT. HAGEN-GOROKA	K27	K17	K10
MADANG-GOROKA	K26	K16	K10

Nupela "Stand-by" (redi tasol) pe bilong baim tiket i helpim yu tru long ran long smatpela balus bilong Air Niugini.

Sapos yu laik ran long dispela nupela tiket em i isi tru. Yu mas mekim olsem;

* Kisim mani nau go stret long Air Niugini opis na baim tiket.

* De yu laik kisim balus yu go stret long ples balus. Go stret long ples ol i makim "Stand-by". Na givim nem bilong yu long tiket opisa. Ol man i go pas bai kisim sia kwiktaim. Ol man i kam bihain i mas wet.

Air Niugini Standby Fares...
a great way to fly and save.

AIR NIUGINI
THE NATIONAL AIRLINE OF PAPUA NEW GUINEA

I GUTPELA GAVMAN DAUNIM NAMBA BILONG OL PABLIK SEVAN?

YU TING WANEM



Anna Wagapu

Anna i bilong Pot Mosbi. Em i wok long Opis ov Infomesen long Mosbi.

Anna i tok, planti pipel i wok insait long Pablik Sevis. Sapos Gavman i no kisim nupela wokmanmeri long i go insait wok, wanem




Michael Haimaboing

Michael em i bilong Sassoya, insait long Is Sepik Provins. Michael i wok olsem kuskus wantaim Pos na Telegrap long Mosbi.

Michael i tok, sapos Gavman i katim daun namba bilong wokman em i

samting bai kamap? Gavman i mas tingting gen long dispela toktok bilong ol na kisim nupela wokmanmeri. Nogut ol i mekim olsem na planti yangpela pipel em ol i pinisim skul i stap nating. Nogat wok bilong ol. Ol kampani i save kisim wokman long laik bilong ol. Long Gavman wanpela man i mas aplai long wok na Gavman i tok orait long ol long dispela wok. Mi ting ol kampani i bihainim gut we bilong kisim nupela wokman. Sapos em i bikhet ol i rausim em wantu.



Thomas Oruari


Thomas em i bilong Moveave insait long Galp Provins. Thomas i wok olsem Pos Masta long Pos Opis long Boroko, Mosbi siti.

Thomas i tok, mi pilim olsem Gavman

i wokim longlong toktok tru long katim daun namba bilong Pablik Sevans. Ol papamama i lusim bikpela mani tru long salim pikinini bilong ol i go long skul. Ol i ting olsem bihainim pikinini bilong ol i winim skul na painim wok na helpim ol long liklik mani samting. Orait sapos Gavman i no kisim nupela wokmanmeri husat tru bai givim wok long ol. Mi ting olsem lo bilong Pablik Sevis tasol i rong. Ol i tok save tasol na larim ol i stap. Bihainim lo bilong kampani. Sapos wokman i rongim wok orait

rausim em na putim nupela man i go in-

sait long dispela wok.



Flora Matthew

Flora Matthew em i bilong KilaKila insait long Mosbi siti. Flora i wok long Play Time Stua long Boroko, Mosbi.

Flora i tok, dispela tingting bilong Gavman i no gutpela tumas. Gavman i bagarapim pinis tingting bilong ol sumatin ol i stap yet

long skul. Planti ol i tingting long i go insait wok wantaim Gavman. Dispela i soim olsem moa moa yangpela insait long skul bai i no inap painim wok. Ol i skul nating na westim mani bilong papamama bilong ol. Em nau planti bilong ol bai raun raun nating long taun na ples na bagarapim lo na oda. Kain olsem Gavman i mas kirapim wanpela nupela wok long helpim ol wokmanmeri em ol i laik painim wok. Mi no ting ol kampani inap tru long kisim olgeta manki em ol i pinisim skul long olgeta yia. Gavman tasol inap long dispela.

save kisim long wok insait long ol Dipatmen, husat tru bai kisim ol sumatin em ol i pinisim skul long dispela yia. Ol kampani tasol i no inap long kisim olgeta. Long olgeta yia planti wokman i save go insait wok long Gavman. Sapos ol i stapim nau bai bikpela wari i kamap. Moa moa man bai i no inap painim wok na ol kain trabel bai kamap insait long kantri. Gavman i mas senisim tingting bilong em na kisim yet ol wok-

manmeri i kam wok long ol. Putim sampela moa wok insait long Pablik Sevis na kisim ol wokman i go insait wok long en. Maski wari long en.



Kewe Kero

Kewe em i wanpela Plisman long Mosbi. Kewe i bilong Erave insait long Saten Hailans Provins.

Kewe i tok, mi sapatim tru dispela tingting bilong Gavman long katim daun namba bilong wokman insait long ol Gavman Dipatmen. Mi amamas long Gavman long tingting bilong ol long putim liklik mani long baset i go long Pablik Sevis. Sapos yu wokabout i go insait long ol

Gavman Dipatmen bai yu lukim 2 o 3-pela man i wok long mekim wankain wok em wanpela man tasol inap wokim. Planti bikman long Pablik Sevis i save yusim posisen bilong kaikaim bikpela mani bilong

Gavman. Nau bai ol i pilim. Planti mani i save lus nating long kain kain Dipatmen bilong Gavman. Olgeta de ol Pablik Sevan i save dringim kopi na ti na ol i kisim dispela mani we na baim ol dispela samting.

Primia Namba 4

Yakobus Talis em i namba wan interim Primia bilong Sandaun Provins, Wes Sepik. Sandaun provinsal gavman i ilektim, em olsem Interim Primia bilong ol long 4 Desemba 1979.

Sandaun provinsal gavman i no kamap provinsal gavman yet. Long 22 Novemba ileksen bai kamap long makim ol memba i go insait long provinsal gavman.

Long 1 Janueri, 1981 Sandaun provinsal gavman tru na ol bai votim nupela Primia. Yumi no save olsem Yakobus Talis bai stap olsem primia yet o nogat.

Mista Talis i bilong Ningil viles, insait long Yangkok sab distrik long Wes Sepik provins. Em i gat 42 krismas. Em i marit na i gat 6-pela pikinini. Yakobus Talis i memba bilong Is Au provinsal

ilektoret long Yangkok.

Yakob i pinisim Gret 6 tasol insait long Seleo Ailan long Aitape. Em i no go long bikskul. Sios bilong em i katolik na bipo em i kamap primia, em i wanpela katekis Bipo long yia 1968 em i wanpela kausila insait long Wape Lokal Gavman kaunsil.

Long yia 1968 em i lusim kaunsil na sanap long ileksen. Em i win na kamap Nesenel Palamen memba insait long wok politik.

Em i tok, taim em i pinis long Primia em bai go bek long ples na wok long liklik tret stua na gaden kopi bilong em.

Em i tok, em i laik lukim olgeta wok bisnis olsem timba na arapela bisnis i mas stap long han bilong ol



Mista Yakobus Talis

pipel bilong Wes Sepik. Ol i mas papa bilong en. Em i laik lukim Nesenel Gavman i bringim gutpela kampani i kam insait long kirapim bisnis long provins.

Em i tok, olgeta

mani ol i kamapim long bisnis i mas i go bek long provins na wok long provins yet. Nogat wanpela liklik toea i mas lusim provins na i go long beng long ol kantri long ovasis.

Ombudsman Toktok

Olgeta memba bilong Nesenel Palamen i kam kibung gen nau long Palamen. Na Ombudsmen Komisina, Mista Ignatius Kilage i ting em i gutpela taim tru bilong skulim ol dispela bikman long lidasip lo.

Mista Kilage i go na givim wanpela liklik buk em i bilong skulim o tokaut long ol memba we tru ol i save kisim pawa bilong kis-


im ol gutpela samting, na skulim ol long lukautim gut biknem bilong ol olsem ol lida bilong kantri.

Dispela liklik buk i gat liklik hap bilong aslo bilong yumi na ol liklik hap lo tu insait long en. Em ol lo i tokaut klia tru long ol wok na sindaun bilong ol lida. Dispela lo i bilong ol nesenel lida na provinsal lida tu.


Lidasip Kod o lo bilong ol lida em i wanpela gutpela samting tru. Tasol em i olsem ol gutpela manmeri na ol gutpela samting. Sapos yumi i no lukautim gut, yumi inap lusim dispela gutpela samting. Olsem na Konstitusene Plening Komtiti i makim Ombudsman Komisina long lukautim dispela lo na lukim sapos ol lida i bihainim o nogat.



Ol lida i no ken daunim nem bilong Gavman bilong PNG. Sam-taim ol lida i save spak na mekim nabaut long pablik ples. Dispela em i no gutpela pasin.



**MORTEIN
TASOL I KEN
KILIM OL
BINATANG
KWIKTAIM**



Misis Colimed Kazu

Maborasa wimens kaunsil



Maborasa em i nem bilong Madang Provinsal Wimens Kaunsil. Dispela nem Maborasa i kam long namba wan na namba tu leta bilong nem bilong 4-pela distrik insait long Madang Provins. Olsem: Madang na Bogia na Ramu na Saidor.

Maborasa em i olsem mama bilong olkain klap bilong ol meri, olkain asosiesin na felosip bilong ol meri long provins. Na ol yut grup bilong ol meri i stap insait tu.

Maborasa i laik helpim ol meri olsem:

1 Em i laik helpim ol meri bai ol i ken save gut long ol arapela meri bilong Madang Provins.

2 Maborasa i laik stap olsem maus bilong ol meri bilong Madang Provins. Em i laik bringim tingting bilong ol meri i go long lokal kaunsil na Provinsal Gavman na Nesanel Gavman.

Long dispela yia mipela ol meri i strong bai mipela i gat maus long Provinsal Gavman. Olsem na primia bilong yumi, em Mista Bato Bultin, i bin makim Misis Colimed Kazu olsem maus bilong ol meri long Provinsal Gavman.

3 Maborasa i laik sanapim gutpela tingting na givim dispela tingting i go long ol narapela lain meri long kantri, na tu long ol narapela kantri, Hia ol meri i ken autim ol wari bilong ol.

4 Maborasa i wok wantaim nesanel kaunsil bilong ol meri.

5 Kaunsil ya i laik helpim ol meri long kirapim bisnis. I gat wanpela meri bilong (ILO) intenesenel leba onganaisesen long Madang i helpim ol meri long kirapim bisnis.

6 Maborasa i laik opim we bilong ol meri kisim edukesen. Tasol edukesen i no min long yu rit na rait tasol. Nogat. Edukesen bilong ol meri i min: pasin bilong bosim wok na kamap lida, pasin bilong kuk na samap.

Wan wan grup i mas baim fi long Maborasa. Smolpela grup i mas tromoi K10. Bikpela klap na asosiesen i mas baim membasip tiket long K20.

Bihain long tu mun samting, Maborasa i laik statim wanpela wimens trening senta. Hia bai ol i skul long samap na kuk na lukautim gut haus.



KARI BANANA
OL SAMTING YU
MAS I GAT:


Tupela tebolspun kari paura.
Wanpela lombo (yu ken katim liklik, liklik o larim)
Wanpela liklik raun anien (katim i go liklik).
8-pela grin banana.
Sol.
Tripela tebolspun gris o wel bilong kuk.

WE BILONG WOK-
IM:


- 1 Rausim skin bilong ol grin banana na katim tu-hau.
- 2 Putim sol long ol banana.
- 3 Hatim gris long praipan. I hat pinis, orait, putim anien a lombo insait na praim.
- 4 Praim isi tasol inap anien na lombo i go braun. I braun pinis, orait, putim kari na tantanim.
- 5 Orait, nau putim ol banana insait na tantanim. Paia i no ken hat tu-mas.
- 6 Sapos olsem wanem, orait, putim liklik wara tu long praipan.
- 7 Sutim kaikai long plet na putim kokonas yu skrapim insait long plet tu.



NIUS I KAM LONG OL POTO




AMERIKA: Nupela presiden bilong Amerika, Mista Ronald Reagan i winim ileksen pinis na i lap amamas holim wanpela niuspepa i autim stori long em i win.



AMERIKA: Lupe Pintor bilong Meksiko, bantom wet wol sempion i nokimaut Johnny Owens bilong Wales, wanpela kantri klostu long Englan. Tupela i pait long Septemba 19. Johnny i airaun long taim Lupe i nokim em aut i stap inap long taim em indai long Mande 22 Septemba.



AMERIKA: Nupela presiden i lap tasol olupela presiden, Mista Jimmy Carter i no lap. Em i kra. Em i lus long ileksen na em i gat bikpela wari tru.



IRAN: Ol Iran studen long ol bikskul i holim kalabusim sampela Amerika stat long bigin bilong yia yet. I kam inap nau na ol i tokaut long Gavman yet i mas holim dispela lain Amerika. Poto i soim lida bilong ol studen i tokaut long tingting bilong ol.



AMERIKA: Olpela presiden bilong Amerika, Richard Nixon, taim em i lusim haus long go vot. Pati bilong em i winim ileksen pinis na ol kisim sia bilong Gavman.



IRAK: Irak i pait na kisim hap graun bilong Iran pinis. Dispela poto i soim wanpela soldia bilong Irak i sanap long wanpela bikpela sip long bris bilong ol sip na was i stap. Dispela bikpela sip i kam painim trabel na anka i stap.

TCM[®] Foklip Strongpela na bilong stap oltaim

I gat 86 model long apim ol kain heve



Long tripela ten yia bilong wok, TCM i bin wokim moa long 20,000 foklip trak, na i salim long olgeta hap long wol. Nau New Guinea Motors, ol save man bilong trak, i salim dispela foklip trak. Stat long liklik FD10 i gat strong long apim 1 tonne, i go inap long bikpela FD350, i gat strong long apim 35 tonne, olgeta i seif, gutpela wok bilong ol, na bilong givim yu namba wan wok long Papua New Guinea.

NEW GUINEA MOTORS 
Ol save man bilong Foklip


TUBU NGM 033

WANTOK — Sarere, 15 Novemba 1980.

Pes 11



Bris wara long wara Ramu antap. Bikipela pang em inap karim buldoza o bikipela trak. Tait i pulim pang o bot i go. Em bus olsem i nogat gupela rot o bris.



Olgeta kago long Brahman i mas kam olsem tasol. Em wara Ramu hia. I no longwe long Uniso long Madang Provins insait long bus.



Wok long nupela Haiskul i go het. Hia em wanpela haus slip bilong ol sumatin. Long 1982 bai i gat 500 sumatin insait long dispela Haiskul.

Wanpela arere bilong Madang Provins em i biksolwara. Narapela arere em i lain bikipela maunten i save go insait long Simbu na lsten na Westen Hailans Provins. Insait long ol maunten yu i gat tupela bikipela senta, em Bundi na Simbai Engliken misin i bin mekim go het Simbai Katolik misin i bin go insait long Bundi long yia 1933 yet. Gavman i kamap bihain.


Wanpela de Pater Morrison i stap long stesin bilong em, Bundi. Em i lukluk i go daun long ol stretpela ples nabaut long wara Ramu. Planti graun i stap, planti bus i stap. Tasol i no gat man. Pater i lukim ol graun ya i stap nating na em i bel nogut.

Orait, nau misin i go baim hap graun long gavman na i tingting long kirapim sampela wok bilong helpim ol pipel i stap insait long bus longwe long taun.

WOK BULMAKAU

Namba wan man i bin go insait na brukim bus em i Mista Maks David, wantaim wanpela lain boi, em ol i katim bus na kirapim wok bulmakau. Kwiktaim tu ol i wokim naispela ples balus na dispela ples balus yet i kisim nem Brahman. Brahman em i wanpela kain kau i kam long India. Planti i stap hia, olsem na pailob bilong balus i givim nem Brahman long en.

Pastaim olgeta samting i mas ka-



Ol bulmakau long Brahman ples ya i kisim nem long dispela bulmakau. Hia yu lukim ol i wokabaut long ples balus. Ol maunten i go long Bundi. Nau ol i wok long rot i go long Bundi, na i go olgeta long Simbu.

BRAHMAN

map long Brahman, em i mas kamap long balus tasol. Ol trakta tu i kam olsem wan wan wil na wan wan hap ensin i kam long liklik balus bilong misin.

Maks David i wok tasol long katim wanpela rot long bus. Madang haiwe i no stap yet. Na tupela riva i banisim stesin wara Ramu na wara Maria. Liklik taim bai em i redi. Provinsal Gavman i ting yet long bris bilong brukim Ramu.

Misin i toktok wantaim Provinsal Gavman bilong wokim wanpela haiskul long Brahman. Provinsal Gavman i helpim tru dispela wok. Ol lain P.W.D. wokman na trak na buldosa i stretim tru ol rot i stap long ples tais.

Long taim ol i klaiam bus long Brahman, ol i sanapim wanpela somil bilong katim ol timba bilong ol yet. Inap nau planti tri i slip i stap i wetim tit bilong so. Tripela lain kamdaman i wok olgeta de bilong yusim ol timba. Ol i bin sanapim samting olsem 20 haus pinis.

Wan wan skul i gat tupela klasrum. Tripela haus skul i pinis. Ol i gat diwai taun na kwila na garamut insait na rup na banis, ol i bi-

long ain tasol.

OL HAUS SKUL

I gat naispela ol haus slip, haus waswas, haus kaikai. Na ol i no sot liklik long wara. Maski tang wara. Ol i pulim mambu plastik i go long wanpela baret bilong maunten. Na wara i swit moa na i ran planti

na oltaim. Bihain ol i ting long wokim haidro pawa bilong wokim lektrik long wara bilong dispela baret yet.

Tude i gat klas seven na klas et long Brahman. I gat samting olsem 220 skulboi i stap. Long neks ya bai 50 skulmeri kamap. Nau ol i redim ol haus bilong ol tripela sista

bai lukaut long ol meri. Hetmasta bilong haiskul em i Alfons Indeng bilong Megiar long Madang Provins. Em wantaim ol tisa i gat naispela haus tru. Famili i gat planti graun bilong gaden. Ol graun i gat gris. No gat raskol, no gat wari.

OL BIKPELA GADEN

Ol sumatin long dispela haiskul ol i bilong ol ples long Ramu antap stat long Simbu i go inap long Bundi na Dumpu na Usino. Ol i no man bilong taun. Planti i man bilong no lukim solwara. Ol i man bilong taitim bun. San i no kamap yet na ol i tromoim sarep i go i kam na katim gras. No gat olkain masin bilong sarepim gras. Ol sumatin wan wan i gat naispela gaden bilong em wantaim bikipela kon na aibika na kaukaun na taro na tapiok na pinat na melen. Wan wan sumatin i gat liklik haus win long gaden. Na olgeta sumatin wantaim i gat viles bilong ol long bus. Long fri taim bilong ol, ol i save malolo long viles ya. Ol i pilim olsem ol i stap long ples.

Skul yet i gat bikipela gaden bilong groim kaikai. I gat planti bulmakau tu i



Bris waia ya brukim wara Maria klostu long Brahman. Namba wan taim yu traim bai yu pret nogut tru. Bris i guria, guria na yu ting bai bruk pundaun. Tasol nogat. Em lo bilong en long mekim olsem.



Manki ya i taitim bun na wokabaut isi isi i go.

stap. Olsem na ol i no sot long abus.

LIKLIK TAUN KAMAP

Tingting bilong ol bosman bilong skul i olsem, long yia 1983 bai skul i redi na pulap tru. Long 1983 ol i ting bai ol i gat 384 boi na 128 meri. Em i mekim 512 olgeta. Long dispela taim bai skul i gat 45 haus olgeta. Em bai olsem wanpela liklik taun. Bai i gat 7-pela haus skul, 4-pela haus waswas, 4-pela haus slip, 13 haus bilong ol tisa. I gat haus kuk na haus kaikai. Bai i gat laibreri na olkain spesel klasrum bilong sayens.



Somil long Brahman. Taim ol i katim bus bilong klinim ples, ol i wokim long olgeta bikipela tri. Somil ya i save wokim plang bilong olgeta haus long Brahman.



Wanpela klasrum long Brahman Haiskul. Bihain ol i laik wokim skul fama hia.

● Frank Mihalic

SKUL
BILONG

STUAKIPA

SKUL BILONG STUAKIPA I SKULIM YU NAU LONG WOK BILONG OL BENK

LESEN NO: 13

Olgeta de, yumi mas lukim stuabuk na painimaut mak bilong mani yumi raitim insait. Namba tu samting, yumi mas kisim mak bilong dispela mani na raitim insait long ripotbuk bilong mani. Oriat, las tru yumi mas kaunim hamas mani i stap insait long bokis-mani.

Sapos dispela mani i no wankain long mak bilong mani i stap long stuabuk na ripotbuk, orait, yumi go bek na sekim wok namba. Ating wok namba i rong. O ating namba yumi raitim daun ya em i no stret.

Sampela taim, mani bai sot liklik. Mani bai i no wankain long mak bilong mani i stap insait long tupela buk ya. Sapos dispela asua i kamap, yumi mas sekim mani yumi raitim long stuabuk. Na tu, yumi mas sekim ol tok save bilong peim kago. Nogut yumi i raitim rong pe insait long ripotbuk bilong mani.

Ating yumi olgeta i save liklik pinis long we bilong rait insait long ripotbuk bilong mani. Oriat, liklik wok long raithan ya em i gat tupela rong. Yumi traim painim.



Orait, yumi mekim liklik wok. Long wanpela pepa nating, yumi traim putim ol dispela

DE	WANEM SAMTING	MANI MI KISIM	MANI MI LUSIM	MANI MI GAT NAU
19-4	MANI MI GAT NAU			29.16.
20-4	MI SALIM OL SAMTING	48.69		77.85
21-4	MI BAIM OL SAMTING	64.91		12.94
21-4	MI PEIM OL WOKMAN		8.40	4.54
21-4	MI SALIM OL SAMTING	61.75		68.27

samting long ples bilong ol stret. Yumi mas bihainim we bilong rait stret insait long ripotbuk bilong mani.

1 - 4	Mani mi gat (lukim pes bipo)	K1,318.20
1 - 4	Pe bilong ol wokman	73.00
2 - 4	Pe bilong pawa	11.60
2 - 4	Mi baim tebol bilong opis	95.00
2 - 4	Mi salim ol samting	208.60
3 - 4	Baim laisens bilong stua	10.00
3 - 4	Kago Oda namba 78	428.60
3 - 4	Kago Oda namba 79	118.70
3 - 4	Mi salim ol samting	300.00
4 - 4	Putim mani long beng	550.00
4 - 4	Baim bensin	11.60
4 - 4	Rent bilong stuahaus	65.00
4 - 4	Mi salim ol samting	246.10

Sapos wanpela long yumi i lus tingting pinis long pasin bilong rait long ripotbuk bilong mani, orait, em i lukim we ol i wokim pinis long yumi bipo ya. Kaunim olgeta mani yumi kisim na tekeweim olgeta mani yumi lusim. Mani i lep i stap em i mani bilong yumi stret nau.





Skul ya i gat 23 lesen long en. Yu ken bungim ol wan wan na wokim wanpela buk.
Buk tru yu ken baim long Skul Bilong Stua-kipa, Box 336, Wewak. Ol i raitim long tok Inglis tasol.



EM GUTPELA BENK BILONG STUAKIPA

PAPUA NEW GUINEA BANKING CORPORATION



Karkarim tenpela manmeri!

Nupela Toyota Lite Ace i save winim ol narapela lik lik kar bilong karkarim manmeri. Igat strongpela 1300cc ensin i no save usim planti benzin na sia inap long tenpela pasindia. Toyota Lite Ace — lukim nau long Ela Motors klostu long yu.



Usim lik lik benzin!



Gutpela han stret.



Planti spes!

TOYOTA LITE ACE



ELA MOTORS

PORT MORESBY	PH 25 4088	
LAE	42 2322	MADANG 82 2188
MT HAGEN	52 1888	WEWAK 86 2255
RABAU	92 1988	KIMBE 93 5155
KIETA	95 6083	POPONDETTA 29 7240
KAVIENG	94 2132	GOROKA 72 1844

GS984(P)



THIS



Policeman Senior Constable Nelson Karmi

IS THE FACE OF THE LAW

Em i pes bilong Plisman Sinia Konstabel Nelson Karmi. Em na ol arapela wanwok bilong em i wet tasol long givim intaviu long ol yangpela man i gat 19 kirsma o moa na i no bin mekim trabel bipo, na i gat laik long joinim Royal Papua Niugini Plis Fos.

Sapos yu ting yu gat olgeta tok i stap daunbilo ya, orait, kam na lukim mipela kwiktaim.

- * Longpela bilong yu i mas 5'4" (162.5 cm)
- * Krismas bilong yu i mas namel long 19 na 30.
- * Yu mas pinisim Fom 4 (Gret 10) pinis na i ken rit na rait long tok Inglis. Yu mas kisim skul setifiket bilong yu i go wantaim yu long taim yu laik go long plis stesin.
- * Yu no mas i gat sik nogut.
- * Yu mas man i no mekim trabel bipo.
- * Yu mas man inap kisim oda na stap olsem olgeta arapela plisman.
- * I gutpela sapos yu singelman.

WE NEED YOU!

HEB593/81W

Watpo Mosbi Spot Tasol

Dia Edita — Inap yu givim mi liklik spes na mi laik autim liklik wari bilong mi. Wari bilong mi i go olsem.

Oltaim mi save kisim Wantok Niuspepa mi save opim i go long las pes we "Wantok Spot" i stap. Mi save amamas long lukim ol spot ol i save pilai.

Tasol mi save lukim i kam i kam inap nau na mi les pinis. Em long wanem, ol piksa em bilong Mosbi spot tasol. Olsem wanem na ol man i save kisim pototo i no laik kam raun long sampela hap na kisim ol piksa bilong ol spot tu? I no Mosbi tasol i save pilai. Nogat. Ol arapela hap tu i save pilai.

Em tasol liklik wari bilong mi. Yu husat pren o wantok i laik sapotim mi o egensim mi, rait tasol long Wantok Niuspepa.

Gabriel Lakia,
Bogia Haikul,
Madang.

Wantok Sistem

Dia Edita — Inap yupela givim liklik spes long mi long bekim pas bilong brata Saimon Kolwara. Pas bilong yu i bin kamap long Sarere, 11/10/80.

Yesa brata mi sapotim yu long wanem mi yet mi sanap long viles kot tu. Na mi save olsem ol viles kot i save wokim wantok sistem. Na tu ol i no save gut long we bilong kot. Ol i save

mekim nating tasol. Sampela i lapun na tingting bilong ol i save paul long kot.

Mi lukim long ples bilong mi long Buang ol viles kot majistret i save paulim ol lapun man na meri.

Em tasol na husat man i laik sapotim mi wantaim brata ya, orait rait i kam long Wantok Niuspepa.

Francis Nahun
Tokanen Viles
Lae, Morobe Provins

Olsem Wanem Long Rot

Dia Edita — Plis yu inap givim liklik spes long mi na mi ken putim liklik wari bilong mi i go insait long Wantok Niuspepa.

Yes, sampela yia i go pinis, mipela ol pipel bilong Wau na Garaina i toktok planti long dispela Wau-Garaina rot. Na long las yia, mipela i harim olsem, bai ol inap wok rot tasol i no gat mani bilong wokim.

Orait, long dispela yia tasol mipela i harim na lukim olsem, Nesanel Gav-

man i baim pinis ol nupela balus long bikpela mani tru. Na mipela i laik save, dispela plen bilong wokim Wau-Garaina rot em i stap long plen bilong Nesanel Gavman o i stap long plen bilong provinsal gavman?

Na mipela ol pipela i stap tingting olsem, mipela i toktok i go na i lus nating gen. Olsem na mipela pipel bilong dispela tupela distrik i singaut strong bai Gavman i ken tromoi sampela kain bikpela mani olsem em i bin yus-

im long baim ol kain balus ya i kam long wokim rot bilong ol pipel bilong em long dispela tupela distrik. Pe bilong balus i go antap tumas. Olsem na mipela i tingting yet long dispela rot. Na wanem taim tru bai dispela plen bilong Wau-Garaina rot i kamap tru?

Em tasol na sapos yu husat brata o susa i laik sapotim tingting bilong mi, yu ken rait tasol i kam long Wantok

Gaipare Pala,
Garaina, Morobe Provins.

I No Marit Kota

Dia Edita — Inap yu givim mi liklik spes long mi autim liklik wari bilong mi.

Mi lukim long ai bilong mi em ol sampela kampani ol i save wokim haus bilong ol marit na bilong ol singelman bilong ol yet. Na olsem wanem long ol kampani i no wokim haus bilong ol maritman.

Mi lukim sampela

marit i slip long singel kota. Em i no gutpela pasin. Na olsem wanem long haus bilong waswas? Bai ol manmeri wantaim waswas long wanpela haus tasol?

Ol bos bilong kampani i no save sekim kompaun bilong ol. Nogat. Bi-hain trabel i kamap long ol yangpela boi bai ol i tok wanem? Mi ting, em i rong

binlong ol bos, long wanem, ol i no sekim kompaun. Na tu yupela ol meri yupe-la i no sem stret long yusim o i stap long singel kota.

Em tasol wari bilong mi. Sapos yu husat i lukim dispela pas na i bel pen o i laik sapotim mi, rait tasol i kam long Wantok Niuspepa.

Sam Bakou,
Lae, Morobe Provins

Meri Tilim Komunio

Dia Edita — Plis inap yu givim mi liklik spes long mi bekim pas bilong Wantok ya Bonifas Lappek em bilong Baitaeta long Madang Provins. Pas bilong em i kamap long Wantok Nius namba 338 bilong Sarere Oktoba 25 1980.

Yes Bonifas long pas bilong yu, yu bin tok olsem, ol Pater na Bisop i lukim wok bilong sios i ran gut na ol i givim sakramen long ol pipel i ken tilim komunio. Em i tru

tasol mi pilim olsem ol man em gutpela long tilim komunio na ol meri em i no gutpela long ol mekim dispela wok bilong tilim komunio.

Long KarKar ailan, Madang mi no lukim wanpela meri i tilim komunio. Nogat. Ol man yes tasol i no ol meri. Ating long ples bilong yu stret long Baitaeta dispela kain wok i stap long meri mas tilim komunio.

Brata tasol long KarKar ailan mi no

bin lukim dispela pasin. Tru ol man em ol i save tilim komunio tasol ol meri nogat. Na liklik askim bilong mi brata inap yu bekim pas long Wantok Nius na raitim wanem hap long Baibel ol i tok long ol meri i ken tilim komunio bilong mi ken lukim na tok stret o em i tru ol meri ken tilim komunio.

Em tasol

Stanley A. Japheth,
Wau, Morobe Provins.

Lus Long Kaikai

Dia Edita — Inap yu givim mi liklik spes na mi autim wanpela wari bilong mi.

Mi gat wari long Arawa taun kaunsil i klosim maket long Mande na Tunde na Fonde. Mi laikim bai ol i mas maket long 6 de long olgeta wik. Em i no stret long ol i maket long tripela de bilong wik tasol.

Na tu ol i mas opim dua long 4.30 am long moning. Ol i save opim long 5.30 am na i no stret. Long wanem, ol meri i kam long

maket i save wet longtaim na ren i save wasim ol long moning. Na tu, ol i save opim dua long 5.30 am long moning na ol planti manmeri i sambai pinis long baim kaikai i save resis long baim o samting na paulim ol samting bilong ol meri. Na kaunsil i no save sori long ol meri liklik.

Nau ol i save maket long tripela de bilong wik tasol. Na planti manmeri long BCL i save lus tru long kaikai na kumu na buai. Olsem na mi laikim bai maket i mas op 6-

pela de long olgeta wik.

Em tasol liklik wari bilong mi. Sapos yu husat i laik sapotim toktok bilong mi, rait tasol i go long Wantok Niuspepa na mi ken lukim.

Joseph Mani,
Arawa, NSP.





Watpo Kilim Meri

Dia Edita — Inap yupela givim mi liklik spes long mi na mi bekim pas bilong brata ya Igninu bilong Kabwum long Morobe Provins.

Yes brata yu bin tok olsem ol yangpela meri long Kabwum ol i save laikim ol man i gat bisnis na yu tok long hawas na radio na bisnis.

Em long yangpela meri bilong Kabwum tasol na yu tok Morobe na em kisim mipela olgeta Morobe. Yes brata wanpela taim yu laik raitim wanpela pas moa yu mas skelim gut laik yu mas raitim pas yangpela meri bilong Kabwum i gat laik long man i gat hamas radio bisnis. Em i gutpela rabis tingting bilong yu brata.

Em tasol liklik wari bilong mi sapos yu husat brata o susa yu gat tingting olsem wanem o sapotim mi orait rait tasol long Wantok Nius na mi lukim.

Nagin Tatai
Pot Mosbi

Ol Posinman Hambak

Dia Edita — Plis givim mi liklik spes na bai mi autim liklik wari bilong mi. Yes wari bilong mi i go olsem.

Mi no amamas tumas long lo bilong PNG insait long Nesenel Palamen. Em i bikos ol i no putim gutpela lo tumas long givim bikpela mekim save long ol man i save mekim posin na sanguma na ol man i save kilim ol arapela man long pablik ples.

Insait long hap bilong mi long Wosera long Is Sepik, i strong tumas long pasin bilong posin na sanguma. Dispela rot tasol i save sotim populesen bilong mipela long wan wan ples. Planti taim mipela i bringim ol dispela kain man i go long kot, tasol ol i no save givim bikpela mekim save long ol. Ol i save kalabusim ol inap tu mun o sikis mun tasol. Bihain em i kam bek na belhat long kalabus bilong em i kilim 5-pela o 10-pela man long wanpela yia tasol.

So mi no amamas tumas long dispela



lo Nesenel Gavman i putim long painim hap posin bilong posinman na bihain kotim em. Dispela lo i save helpim tru ol posinman na sanguma. Mi laikim bai kot i mas bilip long ol man bilong ples i save kotim ol posinman ya.

Mi laik askim Nesenel Gavman long putim lo olsem. Sapos man i mekim posin o sanguma o kilim arapela man, gavman i mas pasinim wanpela spesel ples bilong ol. Dispela ples i mas stap longwe tru. Olsem bai ol posinman na sanguma na bikhetman ya i no ken lukim pes bilong famili bilong ol. Ol i mas stap inap ol indai. Dispela ples i mas bilong ol dispela posinman na sanguma na man bilong kilim ol arapela man tasol. Larim meri i pikinini bilong ol i stap long ples. Na mekim tambu tu olsem meri i no ken go lukim ol. Ol yet i mas stap hatwok long painim kaikai bilong ol yet.

Em tasol liklik wari bilong mi.

Leo Mining,
Wosera, Is Sepik.

Tok Save i go long ol man i save salim pas long Wantok. Sapos yu no putim nem tru bilong yu long pas mipela i no inap prinim leta bilong yu.

Memba Yet i Rong

Dia Edita — Inap yu givim mipela Fitlo Presa Grup liklik spes long bekim pas bilong wantok bilong yumi Gabriel Siu bilong Biem Ailan i bin kamap long Wantok Niuspepa long Sarere 18 Oktoba 1980.

Yes wantok, yu bin toktok long sampela ol politisen man bilong Saten Ailan ol i save tok bihain long memba bilong yumi long provinsal gavman, Mista Leo Seo long ol wok politik bilong em.

Wantok, i luk olsem, dispela hap toktok bilong yu i no tru long putim kamap long niuspepa. Sapos yu save long dispela ol man i save toktok bihain long wok politik bilong Leo Seo, orait, i gutpela long yu mas putim kamap nem bilong ol na tu ol pipel bilong Saten Ailan bai i ken save long dispela ol man.

I luk olsem, dispela hap toktok bilong yu i no tru na bai bringim sem long ol pipel bilong Saten Ailan, Biem Ailan na yu yet.

Gabriel, mipela Fitlo Presa Grup i lukluk long dispela pas bilong yu na i luk olsem as tingting bilong dispela pas bilong yu em yu bin raitim i olsem. Memba bilong yumi long Saten Ailan Grup i bin go kalabus long politikal sait.

Na dispela em i no tru. Memba bilong yumi long Saten Ailan Grup i go long kalabus long ol wok bisnis bilong em yet na long ol pipel bilong Vokeo Ailan. I no problem bilong Saten Ailan, Biem Ailan o yu yet na em i bin go kalabus. Nogat.

Em tasol liklik bekim long pas bilong wantok ya i kam long FPF bilong Vokeo Ailan long Is Sepik Provins. Sapos wantok ya i laik save moa o i wari long tok bilong mipela em i ken rait tasol long Wantok Niuspepa na bai mipela i ken ritim.

Siaman bilong FPG Vokeo Ailan, Is Sepik.

Plisman Kisim Mi Nating

Lia Edita — Inap yu givim sampela spes long mi na mi laik autim sampela wari bilong mi go long ol plisman. Oyes, wari bilong mi i go olsem.

Em i no gutpela long ol plisman i kisim man nating. Ol i mas lukim gut man i mekim trabel o ol i spak nogut tru na mekim nabaut long rot o pablik ples. Em ol dispela kain man em ol plis i ken kisim ol. Maski long kisim man nating nating. Yupela i mas askim gut pastaim na kisim ol.

Na wanpela samting tu em yupela i ken kisim ol man i dring long pablik ples. Tasol yupela i

mas lukluk gut pastaim. Bikos sampela man i baim katen bia bilong ol na ol i karim i go long pablik ples na ol i laik opim wanpela botol na dring. Na yupela plisman i save kisim ol dispela man nating. Em i no gutpela tumas.

Long wanpela de, mi na tripela wantok bilong mi mipei bin baim katen bia na mipela i go sindaun long swim pul klostu long Taurama Futlan na mipela i opim wanpela botol na mipela i laik dring. Mipela i no dring yet na ol plisman i kam na kisim mipela nating tru. Em i no gutpela pasin ol plis i bin mekim. Ol plisman i bin kisim olgeta dispela botol bia na kisim

mipela tu. Na i no gutpela tumas. Em i wanpela rabis pasin tru.

Ol i mas lukim gut man pastaim na tok save long man. Ol i ken tok, yupela i no ken pinisim bia bilong yupela. Yupela i mas karim i go long haus bilong yupela na dring. Em bai mipela i ken karim i go long haus. Bikos mipela i lusim mani long dispela katen na ol plismam i bin kisim.

Mi ting dispela em i no gutpela pasin olsem na mi rait i kam long Wantok Niuspepa.

John Negi Toma,
Bundi, Madang.



THIS



Policewoman Rita Saunat

IS THE FACE OF THE LAW

Em i pes bilong Plismeri Konstabel Rita Saunat. Em na ol arapela wanwok bilong em i wet tasol long givim intaviu long ol yangpela meri i gat 19 kirsma o moa na i no bin mekim trabel bipo, na i gat laik long joinim Royal Papua Niugini Plis Fos.

Sapos yu ting yu gat olgeta tok i stap daunbilo ya, orait, kam na lukim mipela kwiktaim.


- * Longpela bilong yu i mas 5.2" (157.5 cm)
- * Krismas bilong yu i mas namel long 19 na 30.
- * Yu mas pinisim Fom 4 (Gret 10) pinis na i ken rit na rait long tok Inglis. Yu mas kisim skul setifiket bilong yu i go wantaim yu long taim yu laik go long plis stesin.
- * Yu no mas i gat sik nogut.
- * Yu mas meri i no mekim trabel bipo.
- * Yu mas meri inap kisim oda na stap olsem olgeta arapela plisman.
- * I gutpela sapos yu singelmeri.

WE NEED YOU!

MEG 593/81

HAND OVER YOUR FIREARMS

THE POLICE DEPARTMENT IS HOLDING A GENERAL FIREARMS AMNESTY



BRINGIM GAN BILONG YU I KAM

FIREARMS AMNESTI EM I WANEM SAMTING?

Firearms Amnesti i min stat long nau i go inap 17 Novemba em i taim bilong ol man i gat gan i no gat rejista i mas kisim i go long plis stesin na givim ol plis. Sapos yu gat gan i no gat rejista em yu brukim lo. Olsem na yu mas kisim i go nau na givim long ol plis na yu bai i no inap go kalabus. Yu no ken pret. Sapos gan bilong yu em i gutpela yet, orait, yu ken kam na kisim nupela laisens bilong en.

Harim, yu no ken sut! Yu mas kisim gan i no gat regista i go kwiktaim long plis stesin na givim ol plis. Helpim kantri i stap gutpela na bai yu i no inap brukim lo tu.



HEB 627

NUPELA AMERIKA PRESIDEN



Wok politik long wol i strong tru nau long sait bilong ol man i save wok egensim ol-komunis. Dispela em i bikos Mista Ronald Reagan i winim bikpela namba bilong ol vot long Trinde, 5 Novemba na kamap nupela presiden bilong Amerika.

Nupela presiden ya em i gat 69 kris-mas bilong em na em i namba wan lapun tru long kisim dispela bikpela wok tru long wol. Bipo, ol yangpela yangpela man tasol i save winim ileksen na kamap presiden bilong Amerika. Tasol dispela lapun em i save pairap moa yet na egensim tru olkain pasin bilong ol Komunis na olkain man olsem.

I luk olsem, bai em i no inap isi long ol Rasia nau. Ol arapela presiden bipo i no save toktok strong long ol Rasia olsem Mista Reagan.

Reagan em i lapun tasol em i wanpela man i save hat nogut tru long wok politik tude. Em i no wanpela isi man. Nogat. Em i singaut long ol lida bilong ol kantri long Yurop long i mas pairap strong na tokaut strong long ol bikpela samting. Ol i no ken slek. Em i tok, ol i mas spendim moa mani long wokim ol gan, bom na samting bilong pait. Olsem planti pipel i tingem i man bilong tromoi nabaut ol bom nogut.

Mista Reagan i bilong Konsevativ Pati. Pati bilong em i tokaut olsem, olgeta man i mas wok mak. Strong bilong yu, orait, yu wokim bisnis. Sapos nogat, orait, yu no gat bisnis. Presiden Nixon bipo tu i bin wanpati bilong em. Tasol Mista Reagan i save pairap winim Mista Nixon.

Long Amerika yet, Mista Reagan i tok long katim daun sais na pawa bilong

ol lain wok long gavman. Na tu, em i toktok long katim daun takismani bilong ol lain bisnisman na kampani i save peim long Gavman. I luk olsem, pasin bilong kamapim mani bai i stap nau long han bilong ol wan wan man na ol bisnis.

Long dispela taim em i stap presiden, bai ol lain i wok long gavman bai kisim taim stret. Na ol lain bisnisman na ol kampani bai stap isi na amamas tasol. Em i laik katim takismani ol i save peim long gavman i go daun 10 pesen bilong olgeta yia.

Mista Reagan i sapotim tru ol lain i insait long wok bisnis. Olsem na long taim em i winim ileksen tasol, planti pipel tru i stat baim sea long ol kampani nabaut. Ol i bilip olsem, Mista Reagan bai helpim ol bisnis i kamap strong.

Pasin bilong Mista Reagan i wankain liklik long pasin bilong presiden bipo, Mista James Earl Carter. Tasol kain tingting bilong em long ol komunis em i no wankain olsem tingting bilong Mista Carter.

Ol pren kantri bilong Amerika i save egensim ol komunis bai wok gut tru wantim Amerika nau. Bikos tingting bilong ol i wankain long tingting bilong dispela nupela presi-

den. Na bai ol lain komunis i pilim hevi bilong toktok bilong ol dispela kantri i bung wantaim nau.


Tasol planti pipel i pret bai bikpela woa i stat namel long Amerika na Rasia taim Reagan i stap presiden. Na tu ol i wari long planti pipel bai indai long pait.

Presiden Reagan na ol wanpati bilong em long Amerika bai amamas tru long wok wantaim ol kantri long Pasifik. Olsem planti kantri long Pasifik na Amerika tu ol i gat Demokratik sistem gavman. Olsem na tingting bilong ol bai wankain long Amerika na pasin bilong wok wantaim em bai isi tasol.

Mista Reagan na ol wanpati bilong em tu i amamas nogut tru long taim PNG i helpim Vanuatu long kisim independens.

Dispela nupela presiden bai kisim sia bilong olpela presiden long 20 Janueri long neks yia. Na long taim em i kisim sia bilong presiden nau, ating bai gat planti senis i kamap long olkain samting long wol.

Praim Minista bilong Australia, Mista Fraser i salim gutpela tok amamas tru i go long Mista Reagan. Yumi hia long PNG tu, Praim Minista bilong yumi, Sir Julius i salim tok amamas i go pinis long Mista Reagan.



Mista Ronald Reagan

Salim tok save i kam long TOK SAVE, Box 1982, Boroko.

***TOK SAVE** i go long Pitu Angoa Yaku-
mani bilong viles Pevopusa. Bipo tru long
mun Me long yia 1971, mipela i bin kisim
kontrak long Maun Hagen na kam long
Lolobau plantasin long Rabaul. Long taim
kontrak bilong mitupela i pinis long 1973,
yu bin kisim mani bilong yu na go bek long
Lolobau plantasin. I kam inap nau mi no
lukim yu liklik na mi no save yu i stap long
wanem hap tru bilong PNG. Sapos yu luk-
im dispela tok save bilong mi, orait, yu mas
raitim pas i kam long mi. Em hia adres bil-
ong mi. Simon Komba Maini, SHRM
Security, P.O. Box 396, Panguna, NSP.

***TOK SAVE** i go long Tulum Enkol bi-
long ples Kesup long Amele sait long
Madang Provins. Plis, sapos yu lukim dispe-
la tok save bilong mi, orait, yu mas raitim
wanpela pas i kam long mi. Mitupela i skul
wantaim long Hagen Teknikal Koles long
yia 1977 na 1978 na nau mi no save yu
wok we nau. Wanem, yu lus tingting long
Sema Bratas? Plis, traim na raitim wanpela
pas long mi. Sapos yu lukim dispela tok
save na yu laik raitim pas long mi, em hia
adres bilong mi. Bob Ginsua, Barclay Bros,
P.O. Box 337, Arawa, NSP. Tok save i kam
long Bob Ginsua long Arawa.

***TOK SAVE** i go long Guieminga Waska i
stap long sampela hap bilong Kavieng. Mi
laik tok save long yu olsem, pikinini man
bilong yu, Adam Yowu em i marit pinis na
i gat tupela pikinini man. Na Samdo tupela
Wangu tupela indai pinis. Wapai tupela
Yowu tasol tupela i stap yet. Tasol tupela i
lapun tru nau. Mipela i laikim bai yu mas
kam long ples samtaim long dispela yia o
long neks yia. Sapos yu kam long ples, bai
yu lukim ples i senis pinis. Na tu bai yu
longlong long planti brata na susa bilong yu
yet. Yu mas hariap na kam long ples. Dispe-
la tok save i kam long pikinini bilong
Anton Wunum. Nem bilong mi Saly
Wunum.

***TOK SAVE** i go long Wapenamanda
kaunsil klak o kuskus, Mista Noha Yalone.
Bipo mi bin askim yu long sekap long takis
buk long lukim hamas taim mi no tromoi
takis yet na bai yu tok save long mi. Na yu
i no tok save long mi yet hamas taim mi no
tromoi kaunsil takis yet. Na mi wetim yu
yet. Olsem mi no tromoi takis tripela yia
nau na ni laik save hamas mani mi bai tro-
moi. Mi laik salim takis mani bilong mi i
kam long yu. Olsem na mi salim dispela tok
save long yu. Inap yu sekim takisbuk na
tok save long mi hamas mani olgeta mi mas
tromoi. Pinis orait, raitim pas i kam long
dispela adres na tok save long mi. John Nup
Kaman, P.O. Box 770, Panguna, Bougain-
ville, North Solomons Province.

***TOK SAVE** i go long brata bilong mi
Tinsual Wol Sakol Hame bilong Upper
Mendi long Saten Hailans Provins. Mi brata
bilong yu, Nixon Ungia Wer. Brata, long-
taim tru yu lusim ples na lapun mama bi-
long yu. Yu sori long lapun mama tu o no-
gat? Sapos yu lukim dispela tok save na yu
laik rait long mi, rait i kam long dispela
adres. O sapos husat brata o susa i save long
em, plis givim adres bilong mi i go long em.
Em hia adres bilong mi. Nixon Ungia Wer,
Coecon Mendi, P.O. Box 34, Mendi. S.H.P.

***TOK SAVE** i go long pren bilong mi, Mis
Koropyon Pyak bilong Sangui viles long
Enga Provins. Sampela wik i go pinis yu bin
salim tok save i kam long Wantok Niuspepa
na mi ritim pinis dispela tok save bilong yu.
Yu tok olsem, mi wari long ol meri Papua
na mi no salim pas long yu. Mi no seksek
liklik long ol meri Papua. Nogat tru. Pren,
mi tingting g tasol long yu i stap. Sapos yu
tingting long mi tu, yu mas raitim pas i kam
long mi. Adres bilong yu, yu bin givim mi
bipo ya i lus pinis. Olsem na mi no rait long
yu. Sapos yu laik rait long mi, orait, rait i
kam long dispela adres. Ani Philip, P.O.
Box 3552, Port Moresby, National Capital
District. Na liklik tok save bilong mi i go
long yu Mis Koropyon Pyak. Mi tingting
long yu tasol na mi stap long Mosbi.

Long wanpela taim
bipo tru long wanpela
ples long Manam Ailan
long Madang, i bin i gat
wanpela man i stap.
Dispela man em i no gat
famili bilong em. Em
yet tasol i save stap
long hap bilong em yet.

Nem bilong dispela
man em Kongoroki. Em
i wanpela lesman tru.
Em i no save wok gaden
o i go painim abus. No-
gat. Em i save stap tasol
na i go stilim ol samting
bilong ol man long ples
na long gaden:

Dispela man tu sam-
taim em i save tanim ol-
sem pik na raun stilim
kaikai long gaden bi-
long ol man. Na long
taim em i lukim ol man
i kam klostu, em i save
tanim i go olsem ston
gen. Em i wanpela trik-
man tru.

Em i stap na stilim
ol samting kaikai long
gaden na em i lukim ol-
sem, em i no gat plet
samting long putim
kaikai insait nau. Orait,
em i go long ples na
autim ol sospen graun,
ol plet diwai na spun ol
i wokim long sel koko-
nas.

Kongoroki i save stil
olsem na em i inap tru
long olgeta samting. Na
kaikai em i no gat tok
long en. Wanem taim
em i hangre, em i go
tasol long gaden bilong
ol man na stilim ol sam-

ting em i laikim. Ol
manmeri i lukim olsem,
planti samting bilong ol
tru i lus nau.

Orait, wanpela taim,
ol pipel i pasim tok
long painim dispela stil-
man. Olgeta man na
meri i go hait long
gaden bilong ol long
traim lukim dispela stil-
man. Ol i stap i stap na
dispela stilman i slip i
go na hangre i kilim em.

Kongoroki i kirap na
i laik go long gaden bi-
long wanpela meri. Em
i bin lukim mau banana
i stap long asde. Olsem
na nau em i makim
stret dispela gaden. Em
i go kamap nau na i laik
brukim banana na bai
em i kisim kaikai.

Ol manmeri i was i
stap long gaden bilong
ol. Na dispela meri tu,
kam was long gaden bi-
long em. Long taim em
i lukim dispela man i
laik stil nau, em i bik-
maus nogut tru.

Dispela meri ya i
singaut nau, olgeta ara-
pela manmeri nabaut
nabaut i ran i kam. Ol i
ran i kam na laik holim
dispela Kongoroki ya.
Nogat. Dispela man em
asde yet em i givim sik-
sti i go pinis. Em i ran
na ol man i bihainim
em i go.

Ol i ranim em i go i
go na stilman ya em i
sotwin tru nau. Em i go
stret long hul bilong pik
em i bin wokim pinis.

Tasol dispela hul em i
no daun tumas. Em i
ran i go stret na tanim
olsem pik na sindaun
long dispela hul.

Man, ol pipel i kam
tasol ol i putim tamiok
na naip na spia antap
long baksait bilong dispe-
la pik. Ol i sutim sut-
im em i stap na ol i luk-
im blut i ran. I stap lik-
lik na i no gat blut moa.
Ol naip i bruk bruk na
tamiok i stat pairap na-
baut. Na ol spia i bruk
na krungut nabaut.


Dispela man i tanim
pinis olsem ston. Man,
ol pipel ya ol i bel kas-
kas tru long em. Tasol
bai ol i mekim wanem
samting nau? I no gat
nau. Ol i lusim em na i



go long ples.

Na dispela ston i
stap ye long Manuten
Yassa long ples Yassa
long Manam Ailan,
Madang Provins. Dispe-
la ston nem bilong em
Kazi na em i stap yet.

Francis P. Saku,
Manam Island,
Via Bogia,
Madang Province.



INDEPENDEN GAVMAN BILONG PAPUA NIUGINI

IS NU BRITEN PROVINS

Spesel lo bilong yia 1980 long wok bi-
long provinsal ileksen bilong Is Nu Briten
Provinsal Gavman.

WOK BILONG TEKEWE OPISA BI- LONG LUKAUTIM ILEKSEN.

KOMISIN BILONG BOSIM OL
ILEKSEN, long strong bilong pawa em i
kisim long spesel lo bilong yia 1980 long
wok bilong ol provinsal ileksen, em i laik
tekewe notis i bin tok save olsem, Moses
Warpulu bai lukautim ol ileksen bilong
olgeta ilektoret bilong Is Nu Briten Pro-
vins. Notis bilong dispela tok save i bin
kamap long 7 Septemba, 1979 na i bin
kamap insait long Nesenel Gaset namba
G. 59 long 13 Septemba, 1979. Em i
tekeweim dispela man i no ken lukautim
ol ileksen olsem tok save i bin tokaut
long en bipo.

Mi raitim dispela tok save long namba
31 de bilong mun Oktoba, 1980.

J.S. Mileng
Komisina bilong bosim ol ileksen.

SI PAK - AMERIKA



Si Pak long Mosbi i no gat wanpela sakman olsem Thad Lacinak
bilong Amerika. Em i lainim sak hia long karim em taim sak i wok-
im ol trik bilong em. Sapos yu laik lukim orait kisim tiket na go
long Si Pak, Florida, U.S.A.

OL ISRAEL I KALABUS

ORAIT TUPELA I GO WANTAIM, GOD I TOKIM TUPELA PINIS LONG DISPELA I LAS WOKABAUT BILONG ILAIJA, TASOL TUPELA I NO TOKTOK LONG DISPELA SAMTING. TUPELA I KAMAP LONG WARA JODAN NA ILAIJA I HOLIM SAKET BILONG EN NA I PAITIM WARA. ORAIT WARA I BRUK TUHAP NA GRAUN I DRAI NAMEL NA TUPELA I WOKABAUT LONG GRAUN NA BRUKIM WARA.



TUPELA I KAMAP LONG HAPSAIT NA ILAIJA I SANAP I STAP OLSEM EM I PINISIM WOKABAUT BILONG EN.



YU GAT WANPELA ASKIM NAU O NOGAT? LONG WANEM, GOD I LAIK KISIM MI I GO NAU.

MI GAT. MI LAIK KISIM DISPELA STRONG BILONG GOD YU BIN KISIM, BAI MI INAP MEKIM DISPELA WOK BILONG GOD YU BIN MEKIM.

GOD WANPELA TASOL INAP BEKIM DISPELA ASKIM. WET LIKLIK NA LUKIM WANEM SAMTING I KAMAP.



ILAIJA I ASKIM ILAIJA LONG KISIM STRONG BILONG GOD BILONG SKRUM WOK ILAIJA I BIN MEKIM, NA ILAIJA I TOK OLSEM, "NAUBAI MI LUSIM YU, NA SAPOS YU LUKIM GOD I KISIM MI, ORAIT YU KEN SAVE GOD BAI I BEKIM BETEN BILONG YU." TOK PINIS NA WANTU KARIS PAIA I KAM DAUN HARIAP NA KISIM ILAIJA. NA BIKPELA RAUNWIN I KISIM ILAIJA I GO ANTAP.

ILAIJA! MI LUKIM! NAU MI SAVE PINIS. DISPELA STRONG I BIN LUKAUTIM YU I WINIM STRONG BILONG OLGETA AMI.



ILAIJA I SANAP LONGTAIM NA LUKLUK I GO ANTAP. BIHAIN EM I KISIM SAKET BILONG ILAIJA NA I GO BEK. EM I KAMAP LONG JODAN NA I PAITIM WARA LONG SAKET NA WARA I BRUK TUHAP.



Used by permission of the David C. Cook Foundation. Copyright 1973. David C. Cook Publishing Co. All rights reserved.

NUPELA MODERETA

Yunaitet Sios i developim tupela gat nupela Modereta kantri em i lukautim nau. Em i Rev. Albert ToBurua. Em i kisim ples bilong Rev. Leslie Boseto.

Rev Albert i lukim dispela wok bilong em olsem wanpela bikpela wok tru. I no bilong kamap lida na bos nabaut. Nogat. Em i kisim dispela wok long mekim kamap olkain wok.

Na i no bilong wok hia long PNG tasol. Nogat. Em i lukautim wok bilong Bikpela nau na i mas lukim olsem, ol wok i mas kamap wantaim long hia na long Solomon Ailan tu.

Rev. ToBurua i tok, wok bilong em i Modereta bilong Sios. Olsem na em i mas wok strong long

Rev. Albert ToBurua em i gat 38 krismas na em i bilong Matalau viles long Is Nu Briten Provins. Em i go long Nodup Praimeri skul na bihain em i go long Kerevat Haiskul.

Na long 1964 em i sut i go olgeta long skul long Brisben Baibel Koles long Australia. Em i pinis long 1966 na kam bek long PNG. Em i kam bek na go wok long Malmaluan Yut Kristen Senta long Is Nu Briten.

Em i wok i stap liklik na go skul gen long Rarongo Teolojikal Koles. Em i stat long 1968 na pinis long 1970. Em



Rev Albert ToBurua

i winim Diploma bilong skul Teoloji na i go saplen long Kerevat Haiskul.

Rev. ToBurua i tok, wok bilong em i bikpela tru. Long wanem, em i insait tru long namel long Sios nau. Nau em i tok, em bai wok gut

wantaim ol arapela sios. Em i no inap bagarapim gutpren i stap namel long ol sios nau. Nogat.

Em i tok, Sios i mas putim sampela samting pas tru long ol arapela wok bilong sios.

Sande Lotu

SANDE NAMBA TU BILONG ADVEN

7 - DESEMBA 1980

Rit bilong Gutnius i kam long Matyu 3: 1-12

Gutnius tude i stori long Jon bilong Baptais. Em i kamap i stap long ples wesana na ston nating klostu long wara Jodan. Em i holiman i save kaikai nabaut samting bilong bus, na pasim klos skin tasol. Em i mekim olsem sampela profet bilong Olpela Testamen bipo. Ol pipel i ting em i profet olsem na ol i kam harim tok bilong em.

Jon i man bilong pairap long ol bikpela man. Em i no pret, em i tokaut na kolim long ples klia olgeta hambak na sin bilong ol. I olsem man i sutim strongpela lait i go long olgeta kona tudak insait long haus....Lait ya i mekim ai bilong ol binatang nogut i pen, ol i ranawe i kam arasait nau. Jon i krosim King Herod long wanem em i kisim meri bilong brata bilong em. Bihain meri ya i kisim het bilong Jon long wanpela plet.....

Nau ol Farisi na Sadyusi i kamap, em ol bikpela hambakman tru. Jisas tu i save pairap long ol planti taim. Jon i lukim ol i kamap, i luk olsem ol tu i laik tanim bel na kisim baptais. Nau Jon i pairap long ol olsem: "Yupela pikinini bilong snek.... yupela ranawe i kam hia tasol bilong sevim laip bilong yupela." Jon i ting long ol snek i stap long kunai. Taim ol man i kukim kunai, man, ol snek i ranawe i kam ausait hariap tru. Ol Farisi na Sadyusi i olsem tasol.....

Tasol Jon i no bilip ol Farisi i laik tanim bel tru. Oltaim ol i save ting, wantok sistem bai bringim ol i go isi long heven. Ol i mas kolim tasol nem bilong Ebrahim, na ol i insait pinis. Olsem na Jon i smokim ol long dispela tok: "God i ken mekim ol ston i kamap pikinini bilong Ebrahim. Akis i stap pinis long as bilong diwai. Olgeta diwai i no karim gutpela kaikai, em bai ol i katim na tromoim i go long paia." Jon i laik tok olsem long ol: Yupela yet i mas taitim bun. Yupela yet i mas tanim bel. Yupela no ken kolim nem bilong ol santu tasol na go insait nating long heven. Nogat tru.....

Ol dispela kain strongpela tok bilong Jon bilong Baptais i skulim yumi tu. Sampela taim ol hetman bilong sios i mas pairap long yumi bilong stretim pasin bilong yumi. Ol i no ken sarap na lukluk tasol i stap. Na dispela taim i mas kamap

long PNG tu. Planti bikman bilong ol Sios tude ol pret long tokaut. Ol i pret long gavman, ol i pret long krosim ol man i holim pawa long kantri. Ol i pret long maus bilong sampela man bilong politik. Klostu olgeta dispela man i Kristen, tasol sapos ol Sios i kirap tokaut stret long ol, kwiktai ol i kalap nogut...

Ol i go long niuspepa na redio na tokim ol sios olsem: "Yupela ol siosman, yupela i no ken putim nius insait long laip bilong mipela. Wok politik, wok bisnis, em i samting bilong mipela. Em i no samting bilong sios, em i no samting bilong God. Yupela i mas stap longwe."

Yumi lukim dispela kantri tude. Olgeta manmeri nating i save pinis, pasin pamuk i karamapim planti hap moa. Helt dipatmen i tokaut strong moa long sik vidi i go bikpela moa nau. Spakpasin i bagarapim kantri na i bringim trabel tasol. Tasol wataim sampela bikman long ol sios i kirap long ples klia na tokaut strong olsem Jon bilong Baptais long ol dispela samting? Yes, tenpela yia bipo wanpela pris i memba bilong palamen na em i sanap na i givim strongpela tok long ol memba long pasin vidi i kamap nau. Ol memba i mekim wanem? Ol i harim em? Nogat, ol i laik sarapim em. Sampela i tok, em i toknogutim nem bilong wanpela hap bilong kantri. Na tok bilong dispela pris i tru olgeta. Ol memba i tromoim. Na tude, vidi i stap long olgeta hap.

Tasol yu pris o pasto o katekis o evangelis o relisen tisa o bikman long wanpela Kristen Sios, yu no ken ting, yu ken pairap na mekim strongpela tok, na bai ol bikman i harim. Mi pret bai ol i traim sarapim yu... olsem Herot i mekim long Jon.

Wok politik em i bikpela tik nabaut tude long PNG. Planti ol man bilong politik i Kristen. Tasol wanem kain Kristen? Sapos Kristen Sios bilong ol i pointim pinga long sampela pasin bilong ol, i wankain olsem dokta i putim pinga long sua. Bai ol i singaut, i bikmaus moa....Planti dispela Kristen politikal lida i pilim pawa nau. Wanem samting i pasim rot bilong go het bilong ol, i mas raus. Maski em i Sios o wanem samting. Mi lukim pinis. Mi no tok nating.....

TRAM SAVE BILONG YU

1. Wes Sepik i kisim ful-provinsal gavman pinis, o i no yet?
2. Hekota bilong Wes Sepik i stap long wanem hap?
3. Husat i Nesenel Palamen memba bilong Wes Sepik?

ANSA

1. I no yet 2. Vanimo 3. Karl Stack.

PASEL NAMBA 13


Insait long dispela pasel i gat 11-pela nem bilong ol bikman bilong yumi long Nesenel Palamen. Em hia nem bilong ol. LUS, SOMARE, GUISE, KAPUTIN, APARIMA, OKUK, MOREA, ABAL, KWARARA, LEMEKI, CHAN.

H A M I R A P A
S O M A N V R L
O L S O M A R E
M E U K R L H S
A M S A U E O C
R E W I S K A H
I K A P U T I N
N I T K L G U A

Ol nem i kam go long raithan, na long lephan, na antap, na daunbilo, na long kona i go long kona. Yu ken yusim wanpela leta planti taim.

PAINIM ROT

Long las wik yumi bin painim rot long namba wan. Nau bai yumi traim namba tu. Yusim ai tasol pastaim. Sapos ai i no inap, orait, yusim pensil. Neks wik yumi bai traim namba tri.




POTO KWIS

Ol lain man bilong we tru i singsing



Ol Simbu



BIABIA



Nabuto



Sem long yu

Long las Sarere Sande, Mosbi soka i pinis. Olgeta divisen i pilai gren ainal bilong ol. Na ng Sande, ol lain long Tarangau soka klap i kam asim namba tu hap long Primia Risev en painal inap 30 inin olgeta.

Long dispela taim, tanti manmeri i kam long lukim gren ainal bilong primia divisen. Ol manmeri kam long lukim pilai ol i baim K1. Na long taim ol lain bilong Tarangau klap i mekim dispela pasin bilong ol piki- rini, man, bikpela lain manmeri i bel kaskas tru long ol lain Tarangau ya.

Ol lain bilong GFC na Yuni i go

bek long kik long namba tu hap bilong pilai nau, orait, ol lain Tarangau i pul- im lain i go sindaun long ples pilai. Bik- man, bilong Mosbi soka i askim ol long kam stretim wari bi- long ol tasol yau bi- long ol i pas olgeta.

Oke, bikman i les nau em i askim ol plisman i kam na autim ol i kam au- sait long ples pilai. Man, bikpela pasin sem tru ol lain bi- long Tarangau i bin mekim long ai bi- long planti bikman bilong yumi na planti manmeri i kam long sindaun isi na amamas lukim pilai. Rabis pasin tru.



Ol plis toktok wantaim ol Tarangau pilaia taim ol i sindaun pasim pilai. Ol pipel i kros tru. Ol i wet nating taim ol i paitim toktok wantaim plis.

OL YUNI MERI I NO SLEK



Rachael Noah bilong tim bilong ol meri Yunivesiti i spit tru i kam long bomim mak bilong ol meri Togelu. Wanpela meri Togelu i bhainim em i kam tasol Rachael i no kea.



Betty Roberts bilong Yuni na Jenny Subam bilong Togelu tim i putim lek long bal na i laik disko liklik pas- taim. Cathy Kodana bilong Yuni i lap na tok, em i no taim bilong disko. Em i taim bilong kik. Yuni i winim gren painal, 2-1.



INDEPENDEN GAVMAN BILONG PAPUA NIUGINI

IS NU BRITEN PROVINS

Spesel lo bilong yia 1980 long wok bi- long provinsal ileksen bilong Is Nu Briten Provinsal Gavman.

WOK BILONG MAKIM OL OPISA BILONG LUKAUTIM ILEKSEN.

KOMISIN BILONG BOSIM OL ILEKSEN, long strong bilong pawa em i kism long spesel lo bilong yia 1980 long wok bilong ol provinsal ileksen na long strong bilong olgeta arapela pawa em i gat, em i laik makim ol man em nem bi- long ol i stap long kolum 1 long lukaut- im ileksen bilong ples i stap arere long nem bilong em long kolum 2.

KOLUM 1
Nem:

KOLUM 2
Ilektoret.

Orim Ladi	East Baining
Orim Ladi	Kokopo-Vunamami
Orim Ladi	Raluana
Orim Ladi	Bitapaka
Nelson Joseph	Vunadidir
Nelson Joseph	Central
Nelson Joseph	Toma
Nelson Joseph	Reimbar
Hosea Wura	Central Pomio
Hosea Wura	Inland Pomio
Hosea Wura	West Pomio
Sakaia Value	Balanataman
Sakaia Value	Kombiu
Sakaia Value	Rabaul
Sakaia Value	Watom
Sakaia Value	Livuan
Paul Nabog	Duk of York
Leslie Stahi	Lassul - Baining
Kana Wamala	East Pomio
Clement Irasua	Melkoi

Mi raitim dispela tok save long de namba 31 long mun Oktoba, 1980.

J.S. Mileng
Komisina bilong bosim ol ileksen

MOSBI SOKA SEMPION



Ali Yunaitet wantaim Luteran Yut i kunfu long bal. Tupela tim ya i kik long Sarere 8 Novemba long Mosbi seken divisen gren painal. Luteran Yut i win, 1-0.

Kubu bilong GFC resev tim i laik sutim gol tasol Joe, goli bilong Yuni i holim bal na kalap i go aut pinis. Tupela tim i kik long gren painal bilong resev tim na GFC i win, 3-0.



Ol man i kik i save mekim kain kain stail tru. Hia pilaia bilong Ali Yunaitet i flai i kam long subim bal i go long poro bilong em tasol midfilman bilong Yut i sambai pinis long pasim em. Yut i win, 1-0.

Poto - Donaldson Muraba



Ol straika bilong Yut i siksti i kam long sutim gol. Tasol yu husat? Fulbek bilong Ali Yunaitet i sambai i stap na hetim bal i go pinis. Tupela tim i kik long seken divisen gren painal.

TAMBUIM TUPELA LONG KIK

Tupela man i gat biknem long Mosbi soka i kisim tambu long no ken kikbal moa inap tupela in-

dai. Tupela man ya i bin paitim wanpela reperi 4 wik i go pinis. Tupela man ya em Mesulam Valuka na Ariel Kaure.

Narapela tupela pilaia i kisim tambu long no ken kik inap 6 mun olgeta. Long wanem, tupela i bin paitim pilaia bilong

narapela tim. Tupela man ya i Robert Popat na Tikio Piska. Dispela foapela man i bilong Tarangau Soka Klap long Mosbi.

Mosbi Soka Aso-siesen i givim ol dispela mekim save long taim 4-pela man ya i insait tu long bikpela trabel i bin kamap namel

long Tarangau na Yuni long semi painal long 26 Oktoba.

Reperi Popau Malai i pasim semi painal pilai long taim ol sapota bilong Tarangau i ran i kam insait long ples pilai na mekim

nabaut.

Valuka, Piska na Popat i makim PNG long kik pinis long sampela ovasis kantri. Na Ariel tu i stap long tim i go kik long Noumea, Nu Kaledonia long Oceania Kap.

Dispela Phantom komik i mekim tupela stori. Tupela i gutpela stori tru. Namba wan i stori long klostu papa na mama Phantom i dai nau. Na husat tru bai kisim ples bilong papa Phantom na mekim wok bilong ol Phantom?

NO 694

SENSUS RESIS

Opis bilong Nesanel Sensus bai tokaut long hamas pipel tru i stap long kantri bihain long Desemba 21. Wanpela tokman bilong dispela opis i tok, nau i wok long skelim ol toktok ol i bin kisim insait long dispela wok.

Wantok Niuspepa bai tokaut long nem bilong ol pipel i winim sensus resis long Decemba 22. Mipela i kisim pinis 387 pepa bilong dispela resis.

Wantok
Spot
YUNI
WINIM
GFC 3-1

YUNI WIN



Husat i givim baksait na kalap kalap long ai bilong mak ya? Em Moses Murray, goli bilong Yuni. Em i kalap na paitim bal long han i go aut. Yuni i kik wantaim GFC long primia divisen gren painal.



GFC na Yuni tupela i kik long primia divisen painal long Sande. Long poto hia Kauboi i kisim bal na saitim saitim i kam. Kauboi i sutim namba wan gol bilong Yuni. Yuni i win, 3-1.

Long Sande 10 Novemba, 1980 Yuni primia soka divisen i winim primia soka tim bilong GFC, 3-1. Primia risev tim bilong Yuni i lus long GFC, 3-0. Na tim bilong ol meri Yuni na U19 tim bilong Yuni ol i win tu.

Yuni primia tim i win tasol GFC i no isi long ol. Nogat. GFC tu em i wanpela tim i save mekim gutpela klinpela pilai olsem na kik bilong GFC wantaim Yuni long gren painal i amamasim planti manmeri tru i kam was long pilai.

Yuni i kik strong moa long stat bilong pilai yet. Kisakiu Posman na Jassp Patterson tupela i ran spit tru na givim hat taim tru long beklain bilong GFC. Long wik bipo, long taim GFC i kik wantaim PWD, ol straika bilong PWD i larim beklain bilong GFC i mekim kain kain stail nabaut.

Tasol long taim beklain bilong GFC i lukim kain pilai bilong Yuni, ol i no mekim stail. Tupela Philip long midfil bilong Yuni i kik olsem masin tru. Tupela i no malolo liklik. Philip Kauboi i

sutim namba wan gol bilong Yuni.

Bihain liklik GFC tu i stat hat. Ol i kisim kona kik i kam long John Salaman na em i hamaim i go long raitwinga bilong em. Long dispela taim no gat wanpela pilaia bilong Yuni i makim Samson Dagi olsem na em i hamaim gol bilong GFC. Bihain long dispela gol, kepten bilong Yuni, Reginald Monagi i singaut na tokim ol pilaia bilong Yuni long mekim save long GFC.

Bipo long hap taim Kisakiu i sutim namba tu gol bilong Yuni. Na namba tu hap nau, i luk olsem Yuni i givim hat taim tru long GFC. Yuni i kisim foapela gutpela bal na ol inap sutim dispela foapela gol tasol goli bilong GFC, Max Foster i pasim gut tru bal long dispela foapela taim.

Ol straika bilong GFC i save kisim bal na i kam sua stret long lek bilong kepten bilong Yuni na narapela tripela fulbek bilong Yuni.

Kiapugu Matus i sutim namba tri gol bilong Yuni long taim Kisakiu i salim

bal i go long em. Tupela tim wantaim i kik i go i go na taim i pinis. Yuni i win 3-1.

Ol lain i kik

strong long GFC em Max Foster na Julius Posing. Na long Yuni em Jassp, Kisakiu na tupela Philip.

Long divisen bi-

long ol meri Yuni i winim Togelu, 2-1. Na long namba 4 divisen Balopa i winim Kamali. Long namba 3 divisen Cape Nelson i winim

Mopi, 2-1. Na long namba tu divisen Ali Yunaitet i lus long Lutheran Yut, 0-1. Na long namba 1 divisen em Kunta i autim Blu Kumul,

2-1. Long U19 divisen Yuni i winim Guria, 3-1. Na long primia risev GFC i winim Yuni, 3-0.

• Rainsau

AIR NIUGINI

THE NATIONAL AIRLINE OF PAPUA NEW GUINEA

HELPIM KANTRI GO HET



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.